


MOKOLO WANA NA KALVÁRI

 Matondi, Ndeko Neville. [Ndeko Neville alobi: “Nzambe ápambola yo, ndeko!”—N.D.E.] Nzambe ápambola yo, Ndeko Neville. Matondi mingi.

² Mbote, baninga. Ezali litómba ya kozala lisusu awa na tabernacle, na ntongo ya lelo, mpo na kosalela Nkolo, na koteya Liloba pe na kobondela mpo na babéli. Pe nazongisi matondi mingi mpo na mokolo ya lelo.

³ Nakámwaki, ntango nakómaki awa. Ndeko moko apusanaki pe alobaki: “Naboi kozala lokola moto na mbála oyo abongaki te, oyo abikisamaki.” Ezali Ndeko Wright. Nabondelaki mpo na ye, pe Nkolo abikisi ye mobimba. Pe ayaki kopesa ngai mbote ya loboko, na mai na miso, pe alobaki ete—ete alingaki kotónda Nkolo mpo na—mpo na lobiko na ye. Alingaki kozonga awa mpo na kopesa matondi. Nyonso esili. Akómi—akómi na nzoto kólóngónú mpenza sikawa. Tozongisi matondi mpo na matatoli wana.

⁴ Pe, Charlie, yo ná Ndeko Jefferies, soki bolingi, bóyá kofanda na bakíti oyo ezali awa. Bokoki koya, mpo bótíkala ya kotelema te. Ndeko mosusu, kuna, ná Ndeko Wood, bómata awa. Bozali . . . Mwa bisika ezali awa, na kíti ya molai, mpo bótíkala ya kotelema te. Nakanisi ete mwa bisika ezali awa, pe, iyo, bokokaki mpenza koya kofanda na bisika yango.

⁵ Tosepeli ko . . . Nabanzi ete elobamaki, mokolo moko: “Nasepelaki ntango balobaki na ngai. . .” Nzambe ápambola yo, ndeko. [Ndeko moko alobi: “Nasepelaka ntango nyonso kozala pembeni na motei.”—N.D.E.] Matondi. Matondi, matondi. “Nasepelaki ntango balobaki na ngai, tókende na ndako na Yawe.” Yango nde litómba pe esengo ya Moklisto, kokende na ndako na Yawe.

⁶ Ntango natali bipai na bipai, pe namoni baninga na ngai mingi awa, na ntongo ya lelo, nasepeli na yango mingi mpenza. Nasepeli komona Ndeko mobali pe Ndeko mwasi Dauch awa, ya Ohio. Namoni Ndeko mobali pe Ndeko mwasi Armstrong kuna na suka, bauti mosika na Ohio. Nzambe ápambola pe bino nyonso. Pe, oh, soki otali bipai na bipai, okomona bandeko mingi, na lolenge ete ekozala mpasi mpo na kotánga bankombo na bango nyonso. Ndeko mwasi Hoover, tosepeli komona yo awa, na ntongo ya lelo, auti kuna na Kentucky. Ná Charlie ná Nellie, Ndeko Jefferies ná libota na ye, pe bandeko bazali mpenza mingi awa, oyo bauti libanda na engumba oyo.

⁷ Na bongo, na ntongo ya lelo, tozali na elikia ete tokolekisa ntango malamú kati na Nkolo, tozali na elikia ete Nzambe

akokutana na biso mpo na kopambola milimo na biso pe kopesa biso makambo oyo tose ngeli na yango.

⁸ Pe ntango natambwisi miso na esika oyo, soki nabandi kotánga nkombo ya baninga na ngai nyonso oyo bazali awa, nakozua ntango mingi na ntongo ya lelo, mpo na kotánga nkombo ya moko moko. Kozonga na losambo, komona bato nyonso oyo bazali awa, kokutana na bango, esalaka ete námiyoka malamú.

⁹ Ekozala ndenge nini ntango tokokóma na Lola, pe tokokutana Kuna, pe na ntango monene wana, ya bondeko ya libela pe ya Seko, elongo, nzinga-nzinga na Ngwéndé ya Nzambe, ná mapamboli mpenza, oyo biso nyonso tolingaki mingi? Kuna, tokokóma lokola Ye, pe na elilingi na Ye, ná Molimo na Ye likolo na biso, mpo na kokumbamela pe kosalela Ye mpo na Libela, tokolemba ata moke te.

¹⁰ Kanisa naino, okoki kokanisa ata likambo moko te, oyo olingaka kosala, bongo, mbala na mbala, ózánga kolemba kosala yango. Charlie, nabanzi ete, na oyo etali makambo wana, ngai na yo tokendé bokila ya biséndé mbala mingi koleka makambo nyonso oyo tolingaka kosala, kasi, oyebi, sukasuka tolembaka kosala yango.

¹¹ Pe na—nalingaka ko—kotámbola, kokende na bangómbá, kaka mpo na kotámbola. Kasi ntango mosusu nalembaka, pe okomi na mposa ya kosala eloko mosusu.

¹² Pe nalingaka kokúmba motuka. Ntango mosusu nayokaka mwa bolembu pe botaú, pe motema likolo. Nakotaka mbangu na motuka pe nabimi, nasimbi volant, nazali kotámbwisa, wana nazali koyemba: “Nazali na esengo mingi, na lolenge ete nakoki koloba ete nazali moko na bango,” to eloko moko ya ndenge wana. Nasimbi volant makasi, pe nazali koyemba, kotúta lokolo, pe kogánga. Pe, ee, sima na mwa ntango, nalembi, na bongo, nazongi na ndako pe nabandi kosala eloko mosusu.

¹³ Kasi ntango tokobanda kokumbamela Nzambe na Bokonzi wana ya sika, ata ntango moke ya bolembu ekozala te, ekozala ntango nyonso bobele—bobele lipamboli, oyo ezangi suka. Kasi, na ntembe te, na ntango wana tokosila kobóngwana. Tokozala ndenge tozali sikawa te. Tokokóma ndenge mosusu, bikelámo oyo ekeseni na ndenge tozali sikawa. Na bongo, tozali na esengo.

¹⁴ Nazalaki kokanisa. Nayebi te soki nasílá kosala yango, koloba yango to te. Ndeko Charlie, eleki mwa ntango, nazalaki elongo na ye na Kentucky, pe alobaki: “Ndeko Branham, okanisi ete na Millenium, ngai ná yo tokokende bokila ya biséndé?”

Nalobaki: “Nandimi te, Charlie.”

¹⁵ Alobaki: “Kasi, tolingaki yango mingi,” alobaki, “okanisi ete tokosala yango ntango tokokóma na Millenium?”

Nalobaki: “Te, eloko moko te ekobomama na Millenium.”

Pe alobaki: “Kasi, tolingaki yango mpenza.”

16 Nalobaki: “Charlie, bongo soki nakokaki kondimisa yo ete, na eleko moko boye, ozaláká ngulu, bongo omataki na mosándá ya likolo, kino ete okómi moto? Okolinga ete mokolo moko, okolinga lisusu kozonga mpo na kosepela na bisengo ya ngulu?”

Alobaki: “Te.”

17 Nalobaki: “Omoni, okozala mpenza na mosándá ya likolo koleka ngulu, ndenge okómi sikawa moto, na lolenge ete okolinga lisusu ata moke te kozonga ngulu.” Nalobaki: “Sikawa yíkánisá yango mbala nkóto zomi, yango nde okokóma ntango okobóngwana uta na lolenge oyo kino na lolenge oyo okokóma. Okolinga lisusu ata moke te kozonga moto.”

18 Ya solo. Ekozala eloko moko ya ndenge mosusu. Kaka ndenge nakanisi yango, epesi ngai esengo mingi, koyeba ete mokolo moko, tokomata na mosándá ya likolo koleka.

19 Ee, sikawa, soki Nkolo alingi, lomingo ekoya, ekozala na ba... Na sima, nakosala mobembo, nakokende na Wyoming, ná moninga moko ya malamau; to tokokende nde na Idaho, ná moninga na ngai ya malamau, Ndeko Miner Arganbright, Ndeko Clayt Sonmore, ba-Homme d’Affaire Chrétien.

20 Mpóso ekoya, sima na mpóso ekoya, elingi koloba; mokolo mwa 7, nasengeli kozala na—na Dallas, na Texas, na Convention de la Voix de la Guérison. Pe ngai nakoteya na mpokwa ya mokolo mwa 7. Na sima, nakozonga, mpo na koleka na Idaho elongo na Ndeko Arganbright ná ba-Homme d’Affaire Chrétien. Ntango mosusu nakolekisa mpokwa moko na Minneapolis, liboso ete tókóba mobembo. Na sima, petit Déjeuner ya ba-Homme d’Affaire Chrétien.

21 Soki Nkolo alingi, na ntongo ya lomingo ekoya nalingi kozonga awa na tabernacle, soki nazui ndingisa pe soki ezali mokáno na Nkolo. Nalingi koteya likolo na *Ekumbaki Kati Na Mopepe*, soki Nkolo alingi. Ezali lokola ete yango nde ezali na motema na ngai, mpóso oyo mobimba.

22 Pe na ntongo moko, na ntongo-ntongo, na bangonga ya minei na ntongo, nalamukaki pe nazuaki likanisi oyo: “Mokolo wana na Kalvári.” Pe nalingi kolobela yango, na ntongo ya lelo: *Mokolo Wana Na Kalvári*.

23 Pe sikawa mpo na kotánga yango, tózua sikawa, na ba-Biblia na biso, na Likomi, na Nsango-malamau ya Santu Matai, na mokapo ya 27. Tokobanda na molongo ya 27 pe tokotánga eteni ya Likomi oyo, mpo tózua mobokó, na sima tokobanda mbala moko. Pe sima na litéya, nde tokobondela mpo na babeli.

24 Pe, oh, uta mbala eleki oyo nazalaki awa, nakaniselaki bato pe natalisaki lolenge ya mosala na ngai ya sika. Nazui matatoli mingi ya liyangani yango, koleka oyo nazuaka na mayangani mosusu, na ntango molai.

²⁵ Ezali na ntina, ete osengeli kokutana na moto, ata soki bikamwa etalisami ebele ndenge nini. Kasi, bomoni, lobiko na nzoto esengeli kotongama likolo na kondima ya moto na moto. Sikawa, soki moto yango azali na kondima. . .

²⁶ Pe, ndakisa, soki bamoni Molimo Mosantu kotámbola likolo na eyanganelo pe koloba: “Makambo *boye na boye* esalemaki. Pe, nkombo na yo *sóngóló*. Pe outi na esika *boye*. Pe osalaki likambo *boye*. Pe ekosalema *boye*.” Pe bamoni nyonso wana kokokisama mpenza ndenge wana!

²⁷ Ata bongo, moto oyo afandi wana, asengelaki kotómbola miso pe koloba: “Oyo wana esengeli kozala Nzambe. Nayambi lobiko ya nzoto na ngai.”

²⁸ Kasi, na esika ézala bongo, moto alobi: “Ngai, tiela ngai maboko pe bondela mpo na ngai, mpo ngai nábika.” Kasi batéyá biso nde bongo, awa na Amerika, na bongo, ete tóndima yango. Pe, na ntembe te, yango elongobani na Makomi.

²⁹ Kasi tomónaka, na Afrika pe na bisika ndenge na ndenge, ete soki kaka likambo moko ya ndenge wana esalemi, bato nyonso bakosémbola maboko na mbala moko, pe bakoyamba lobiko ya nzoto na bango, mpo batéyá bango eloko moko te. Bomoni? Batéyá bango ata lobiko na nzoto te. Na bongo, soki bamoni bongo, bayebi ete Nzambe moko azali, oyo azali na bomoi. “Pe soki Azali na bomoi, A—Aleki nyonso, pe A—Abikisaka.” Pe esalemaka bongo, mpo mobokó esílí kotiama, mibokó, ete Azali mobikisi oyo abikisaka bato. Na sima, ntango bamoni Bozali na Ye kosala kati na Lingomba na Ye, na bongo balobaka: “Yango ekati likambo. Yango nde nyonso oyo tosengeli na yango.”

³⁰ Kasi biso batéyá biso “kotiela babeli maboko”, ná makambo ya ndenge wana. Yango wana etámbolaka mpenza malamau te na Amerika.

³¹ Sikawa, bóbósana te, na ntongo ya lomingo ekoya, soki Nkolo alingi, na ntembe te, Ndeko Neville akopesa liyebisi yango. Pe. . . e. . . *Ekumbaki Kati Na Mopepe*.

³² Sikawa, nazalaki kopesa bino mwa ntango ya kofungola Makomi, na Matai 27. Tóbanda kotánga na mo—molongo ya 27, ya Nsango-malamau ya Santu Matai. Sikawa tóyoka litánga na bokebi.

Pe basodá ya moyangeli bamemaki Yesu na ndako ya moyangeli, pe bayanganisaki basoda nyonso liboso na ye.

Balongolaki ye bilamba, pe balatisi ye kazaka ya motane.

Batongaki motóle ya nzúbe, batiaki yango likolo na motó na ye, pe batiaki mokékélé na loboko na ye. . . : pe bazalaki kofukama liboso na ye mpo na koseka ye, bazalaki koloba, Mbote, Mokonzi ya Bayuda!

Pe bazalaki kobwakela ye nsoi, kozua mokékélé pe kobeta ye yango na motó.

. . . ntango basilisaki koseka ye, balongolaki ye kazaka yango pe balatisaki ye bilamba na ye, pe bamemaki ye mpo na kobáka ye na ekulusu.

Ntango bazalaki kobima, bamonaki mwana mboka Sirene, nkombo na ye Simona: batindaki ye na makasi ete ámema ekulusu na ye.

Ntango bamataki, bakómaki na esika babengi Gologota, elingi koloba, esika ya mokuwa ya motó,

Bapesaki ye mai ya ngai oyo basangisi na mai ya bololo mpo ámela: . . . ntango amekaki yango, aboyaki komela.

Ntango babákaki ye na ekulusu, babwaki mbese mpo na kokabola bilamba na ye, mpo makambo oyo mosakoli asakolaki ékokisama, Bakaboli bilamba na ngai, pe babwaki mbese mpo na kokabola kazaka na ngai.

. . . bafandaki kuna pe bazalaki kokengela ye;

Pe batiaki . . . na motó na ye likambo oyo bafundaki ye na yango, bakomaki, OYO NDE YESU, MOKONZI YA BAYUDA.

Bongo babákaki miyíbi mibale na ekulusu elongo na ye, moko na loboko ya mobali, pe mosusu na loboko ya mwasi.

Bongo ba—baleki-nzela bazalaki kofinga ye, pe koningisa mitó na bango,

Pe koloba, Yo moto obukaki tempelo, pe otongi yango na mikolo misato, ómibikisa yo moko. Soki ozali Mwana na Nzambe, kita na ekulusu.

Ndenge moko pe banganganzambe bakonzi ná bakomeli ná mikóló bazalaki koseka ye pe koloba:

Abikisaki bamosusu; akoki komibikisa ye moko te. Soki azali mokonzi ya Yisalaele, ákita sikawa na ekulusu, pe tokondimela ye.

Atielaki Nzambe motema; ábikisa ye sikawa, soki akolinga kobikisa ye: mpo azalaki koloba ete, Ngai nazali Mwana na Nzambe.

Miyíbi pe, oyo babákamaki na ekulusu elongo na ye, bazalaki kolobana mabe, kolobela ye mabe.

Bandá na ngonga ya motoba molili ekotaki na mokili mobimba, kino na ngonga ya libwa.

Pene na ngonga ya libwa Yesu abelelaki na mongongo makasi, alobaki: Éli, Éli, lama sabakatani? elingi koloba, Nzambe na ngai, Nzambe na ngai, mpo na nini otiki ngai?

Bato mosusu oyo bazalaki wana, ntango bayokaki bongo, balobaki, Moto oyo azali kobenga Eliya.

Pe na mbala moko...moko apotaki mbangu pe akamataki linyuká pe apolisaki yango na mai ya ngai, pe atiaki yango na mokékélé, pe apesaki ye ete ámela.

Bamosusu balobaki, Bótika, tótala soki Eliya akoya mpo na kobikisa ye.

Yesu agángaki lisusu na mongongo makasi, pe azongisaki molimo.

Pe, tala, ezipeli ya tempelo epasukaki na mibale, bandá na likolo kino na nse, pe mabelé eninganaki, pe mabanga epasukaki;

...bankunda efungwamaki pe bibembe mingi ya basantu oyo balálaki esekwaki,

Pe babimaki na nkunda sima na lisekwa na ye, pe bakotaki na engumba mosantu, pe bato mingi bamonaki bango.

Kasi mokonzi ya basoda pe basoda oyo bazalaki elongo na ye mpo na kokéngela Yesu, ntango bamonaki koningana na mabelé pe makambo oyo eutaki kosalema, babangaki mingi, balobaki, Ya solo oyo azalaki Mwana na Nzambe.

³³ Tógumba mitó mwa moke mpo na libondeli.

³⁴ Nkolo, toyebi ete Ozali Nzambe. Pe yango...Sima na kotánga Liloba ya búle pe mosantu oyo, tozali naino komona ete lolenge na Yo ebongwani te. Ozali kaka Nzambe. Pe emonanaki lokola ete Yesu alingaki kosungama ata moke te, ete Azuamaki na maboko ya bato mabe oyo bazokisaki Ye nzoto mobimba, babwakelaki Ye nsoi, pe batiolaki Ye, pe Azalaki likolo na ekulusu, makila ezali kotanga, pene na liwa. Pe emonanaki lokola ete lisungi ata moko ezalaki te, na esika moko te, na lolenge ete ata Ye moko agángaki: “Nzambe na Ngai, Nzambe na Ngai, mpo na nini Otiki Ngai?”

³⁵ Kasi, Yo osalaka na ntango oyo eloko mosusu ata moko ekoki kosala te. Bayebisaki biso, Nkolo, ete soki tozali na bibale oyo tokoki kokatisa te, soki tozali na bangomba oyo tokoki koleka te, Nzambe azali nganganga oyo asalaka makambo oyo bamosusu bakoki kosala te.

³⁶ Ozali nganganga, ozali kosala, mpo Oyebaki ntina ya mokolo wana na Kalvári. Lokola Ozali Nzambe, oyo azali na suka te, Oyebaki ete ngonga wana esengelaki koya. Kasi ntango ekokisamaki, nde Otalisaki ete Ozalaki Nzambe. Otalisaki Nani azalaki mokonzi. Oningisaki mabelé, pe basantu oyo basilaki kolala kati na mabelé basekwaki. Oyíndisaki moi na butú, lokola

molíli ya butú, mpo na kotalisa ete Ozalaki Nzambe. Kasi ezalaki lokola ete Ofandaki kimia ntango molai.

³⁷ Tika ete, uta na yango, tókáta ntina, ete, na ntango nyonso oyo tozali kotámbola na Molimo, oyo tokambami na loboko na Nzambe, ata soki makambo emonani lokola ezali kotámbola malamú te, ata bongo, tozuami liboso na Kalvári; Nzambe akoloba na ngonga oyo esengeli, na ntango oyo esengeli.

³⁸ Sikawa, Tata Nzambe, tosengi bolimbisi ya masumu na biso pe ya mabunga na biso. Tosengi ete Molimo na Yo ékamba biso. Kambá biso, ndenge Ebenga akambaki Mwana-mpate. Tika ete tózala na botosi na nyonso oyo ekoki kokómela biso, wana toyebi likambo oyo, ete Nzambe atambwisaka makambo nyonso mpo na bolamu, pe toyebi ete ekozala malamú.

³⁹ Zalá na biso lelo, na liyangani oyo. Tobondeli ete Óbikisa milimo ya baoyo bakoki kobikisama, baoyo bazali koluka lobiko. Baoyo bazali koluka Bomoí ya Seko, tóndisa bango na Yango. Tobondeli ete Óbikisa baoyo bazali na bokono pe na bolózi, baoyo bayei koluka lobiko. Pe tokosanzola Yo mpo na yango. Tosengi yango na Nkombo ya Mwana na Yo, Mobikisi na biso, Yesu Klisto. Amen.

⁴⁰ Sikawa, na liteya ya ntongo na lelo, tolingi kobenda bokebi na bino na eteni oyo naponaki mpo na kolobela: *Mokolo Wana Na Kalvári*.

⁴¹ Emonani lokola ete ebongi mpenza mpo na ntango oyo te; esengelaki kotéyama mokolo mwa Mitano Mosantu. Tosengelaki kokanisa Kalvári mikolo nyonso. Toyóká makambo mingi likolo na yango, totángá makambo mingi likolo na yango. Batei batéyá likolo na yango, uta na ebandeli ya ntango. Bayembi bayémbá likolo na yango, kati na bileko. Basakoli basakólá yango, mibu nkóto minei liboso ete ékokisama. Pe basakoli ya lelo bazali kotalisa bato ntango oyo likambo yango esalemaki. Ezali mokolo moko ya motuya mingi! Na mikolo nyonso oyo Nzambe atánísá na mokili, yango ezali moko na mikolo oyo eleki na motuya.

⁴² Bongo soki Kalvári ezali na motuya mingi boye mpo na bato, nakanisi ezali malamú ete tózonga sima mpo tótala yango malamú, mpo tóyeba mpenza ntina na yango mpo na biso. Mpamba te, nandimisami, na ntango oyo ekómi mosika boye, oyo tozali kobika kati na yango, tozali koluka makambo ya Nzambe nyonso ya motuya, oyo tokoki koyeba. Pe nyonso oyo tokoki komona, toyei awa mpo na koyekola yango, komona oyo ezali mpo na biso, oyo Nzambe asálá mpo na biso, pe komona makambo oyo Alakaki ete Akosala mpo na biso. Pe yango nde ntina toyaka na losambo. Yango wana motei ateyaka, yango wana ayékolaka pe amaniolaka Makomí, pe alukaka mpémélá, ezali mpo azali mosali ya bato, mpo na libota ya Nzambe. Pe alukaka kozua eloko oyo eko. . . oyo Nzambe akolinga koyebisa libota na Ye, eloko moko oyo ekosunga bango. Ntango mosusu,

ekoki kozala, kokweisa bango na masumu na bango, kasi ekoki kozala lisungi mpo na kotelemisa bango, mpo bákoka kotika masumu na bango, pe kotelema mpo na kosalela Nkolo. Batei basengelaki koluka makambo oyo.

⁴³ Pe mokolo yango, lokola ezali na motuya mingi, moko na mikolo ya monene koleka, tótala makambo misato oyo ekeseni, oyo mokolo yango etalisaki mpo na biso. Tokokaki kozua makambo nkama na nkama. Kasi, na ntongo ya lelo, naponi bobele makambo misato oyo ekeseni, ya motuya monene, oyo tolingi kotala na mwa ntango oyo ezali kolanda, oyo Kalvári etalisaki mpo na biso. Pe nabondeli ete ékwéisa mosumuki nyonso oyo azali awa; ésála ete mosantu nyonso ábuka mabólóngó, ésala ete mobeli nyonso átómbola kondima na ye epai na Nzambe, pe ábima awa, abikisami; mosumuki nyonso, abikisami; mozóngi sima nyonso ázónga na nzela, pe ámiyoka nsóni; pe mosantu nyonso ásepela, ázua mpíko ya sika pe elikia ya sika.

⁴⁴ Likambo moko ya monene pe ya motuya, oyo Kalvári etalisi mpo na biso pe na mokili mobimba, ezali ete, ekataki likambo ya lisumu, mbala moko mpo na libela. Moto akweisamaki na lisumu. Pe lisumu ezalaki etúmbu oyo moto ata moko te akokaki kofuta. Etúmbu yango ezalaki monene mingi na lolenge ete ata moto moko te akokaki kofuta etúmbu yango. Nandimaka mpenza ete Nzambe nde abongisáká yango ndenge wana, ete etúmbu yango esengelaki kozala monene mingi na lolenge ete ata moto moko te ákoka kofuta yango, mpo Ákoka kofuta yango, Ye moko. Sikawa, etúmbu ya lisumu ezalaki kufa. Pe biso nyonso tobótamaki na lisumu, zémi na biso ezuamaki na lisumu na nko, tobotamaki na lokuta na monoko. Yango wana ata moto moko te kati na biso abongaki, to, bamonaki ata moto moko te na mokili, oyo abongaki.

⁴⁵ Pe lisumu ebandaki na mabelé te. Lisumu ebandaki na Likolo. Lusi-. . . azalaki. . . Lusifele, zabolo, azalaki ekelamo oyo akweisamaki, mpo na kozanga botósi na ye, liboso kútu ákoma na mabelé. Lisumu ebandaki na Likolo, epai Nzambe atíá Banje, pe bongo na bongo, na mobokó yango moko oyo Atiá bato; boyébi, nzete ya boyébi, nzete ya Bomoí ná nzete ya boyébi, epai oyo moto akokaki kopona ye moko. Pe ntango litómbe ya kopona epesamelaki Lusifele, alingaki eloko moko ya kitoko koleka oyo Nzambe azalaki na yango. Mindondo ebandaki nde wana.

⁴⁶ Pe eloko moko esengamaki mpo na lisumu. Eloko oyo esengamaki ezalaki nde kufa. Kufa nde ezalaki etúmbu. Pe, na yango, tokokaki kokota na bozindo na yango mpenza, mpo nandimaka te ete kufa ezali bobele moko. Bomoí ezali bobele moko. Pe nandimaka ete moto oyo azali na Bomoí ya Seko akoki kokufa ata moke te. Pe nandimaka ete molimo oyo esali lisumu ekolímwisama mobimba, mpo Biblia elobi:

“Molimo oyo esali lisumu, yango nde ekokufa mpenza.” Moto te; “*molimo* oyo esali lisumu.” Na bongo, na ntembe te, Satana asengeli kokufa, kobébisama mobimba. Nandimaka makambo ya ba-universaliste te, oyo balobaka ete Satana akobikisama! Asalaki lisumu, pe azali mobandisi ya lisumu. Molimo na ye esalaki lisumu; pe azalaki molimo. Molimo yango ekolimwisama mobimba, eloko na yango ata moko te ekotikala.

⁴⁷ Pe ntango lisumu ekómaki na mabelé, kuna na ebandeli, lokola elamba ya moíndo ezali kokita longwa na likolo, ebúkaki mpenza mabelé. Ebwakaki bikelamo nyonso, ya mabelé, pe biloko nyonso oyo Nzambe akelé, na boómbo. Moto azalaki na nse ya boómbo ya kufa, bokono, mitungisi, bolózi. Bikelamo nyonso ekweaki elongo na yango. Lisumu ezalaki anesthésie oyo ebukaki mpenza mokili. Na bongo tozalaki awa, tozangaki elikia, mpo bikelamo nyonso ya mokili ekonzamaki na yango. Pe moto nyonso oyo abótámá na mokili akonzamaki na yango.

⁴⁸ Na bongo, esengelaki kouta na Esika moko boye, oyo lisumu ezali te. Ekokaki kouta na mabelé te. Moko na biso akokaki kosíkola moninga te. Esengelaki kouta na Moto mosusu.

⁴⁹ Yango wana, ntango moto amonaki ete akabwani na Nzambe na ye, akómaki kotelengana. Bakómaki kolela. Bakómaki kogánga. Bakómaki konyókwama. Bakómaki kotelengana, na bangómbo pe na bilíki, mpo na koluka Engumba oyo moyemi pe motongi na yango ezali Nzambe. Mpamba te, ayebaki ete soki azongi Liboso na Nzambe, akokaki kosolola na Ye mpo na kosilisa likambo yango. Kasi nzela ya kozonga sima ezalaki te. Abungaki. Ayebaki te ábaluka na ngámbo nini, na bongo abandaki kaka kokende, kotelengana, koluka esika moko oyo ekotalisa ye nzela mpo ázónga na Esika yango. Eloko moko kati na ye ezalaki koyebisa ye ete autaki na—na Esika oyo ebongi be. Moto ata moko te azali awa, kati na bato oyo bazali awa, na ntongo oyo, to kati na bato oyo bakoyoka bande oyo, epai yango ekokende, na mokili mobimba, moto ata moko te azali awa, to na esika mosusu, oyo azangi koluka kobonga be wana.

⁵⁰ Soki ofuti ba-facture na yo, omilobeli: “Ekosilisa likambo.” Ntango ofuti ba-facture na yo, na sima, moto moko abéli na libota na yo. Ntango bokono esili, na sima, okómi na ba-facture mosusu ya kofuta. Kala mingi te, suki na yo ebandi kokóma pembe, pe okómi na mposa ya kozonga elenge. Makambo ezangaka te, ntango nyonso, pe ezali mpo na mbóngé wana ya lisumu. Kasi na motema na yo, lokola olukaka yango, etalisi ete Kobonga be moko ezali na esika moko boye. Na esika moko boye, eloko moko boye ezali.

⁵¹ Yango wana, mbala mingi, lelo, mosumuki azali kaka kotelengana. Elenge mwasi kitoko akokata suki na ye, mpo áyebana; akopakola-pakola elongi na ye, mpo ákóma kitoko; akoláta bilamba mpo na kolakisa lolenge ya nzoto na ye.

Mpamba te, ezali eloko bobele moko oyo akoki kozua, kozua na esika moko, wana azali koluka ete eloko moko ézongela ye, ntango akoki kosala ete mibali bábenga ye na siflé, bápepa ye loboko, bábima na ye. Elenge mobali akosala ndenge moko epai na mwasi, akoluka komibongisa mpo mwasi ásepela na ye. Bazalani bakotonga ndako, bakobongisa yango na lolenge moko boye, mpo éleka ndako ya mozalani na ye na mwa kitoko. Ezalaka ntango nyonso, tolukaka eloko moko boye, kasi eloko mosusu ekoya koleka yango mwa moke. Elenge mwasi akomona ete elenge mwasi mosusu ayebani mingi koleka ye. Mozalani akomona ndako oyo eleki oyo ya ye na kitoko. Mwasi akomona mwasi mosusu alati na lolenge moko boye, oyo abimí kitoko koleka ye.

⁵² Eloko moko ezali kati na biso, oyo elukaka eloko moko boye, pe elakisi ete tosílá kobunga. Tolingaka kozua eloko yango oyo ekosilisa mposa na biso, oyo ekosilisa nzala oyo ezali kuna na kati, kasi emonani lokola tokokaka kozua yango te. Bato balukaki yango na kati na bileko. Balelaki mpo na yango. Bagángaki. Basalaki nyonso oyo bakokaki kosala, kasi ata bongo, bazuaki yango te, wana bazalaki kotelengana na mokili.

⁵³ Sukasuka, mokolo moko, ezali mokolo wana na Kalvári, Moto moko akitaki uta na Nkembo. Moto moko, na Nkembo Yesu Klisto, Mwana na Nzambe, Autaki na Nkembo, pe Kalvári esalemaki. Na mokolo yango nde ntálo efutamaki, pe likambo ya lisumu esilaki mpo na libela. Pe efungolaki nzela kino na eloko oyo tozalaka na nzala pe mposa na yango. Yango nde ememaki biso na esika oyo esilisaka mposa. Moto moko te asílá kokóma na Kalvári, pe amoni ndenge likambo yango esalemaki, bongo átíkala ndenge azalaki. Nyonso oyo azalaki na mposa na yango, to oyo azalaki koluka, akutani na yango, ntango akómi na esika yango.

⁵⁴ Ezalaki mokolo moko ya motuya mingi, pe likambo moko ya motuya mingi, na lolenge ete eningisaki mokili. Eningisaki mokili, etikálá naino koningisama ndenge wana te. Ntango Yesu akufaki na Kalvári pe afutaki nyongo ya lisumu, molílí ekotaki na mokili oyo ya masumu. Moi elálákí na katikati ya mokolo, elembaki nzoto. Mabanga eninganaki, bangómba epasukaki, pe banzoto ya bakúfi ebimaki na nkunda.

⁵⁵ Esalaki nini? Nzambe akendeki mbala moko na Kalvári. Azokisaki nyama wana, oyo ebengami Satana, mpo na libela. Sikawa akómá na nkanza mingi koleka, banda wana, mpo epesaki bato Póle. Pe moto nyonso ayebi ete nyama oyo azoki mpota akómaka na nkanza koleka, akómá komibenda ná mokongo ebúkáná. Sikawa, Satana akweyaki makalékalé, na Kalvári. Mabelé etalisaki ete ezalaki bongo.

⁵⁶ Ntalo ya monene koleka oyo esílá kofútama, pe Moto bobele moko oyo akokaki kofuta yango, ayaki kosala yango na

Kalvári. Kuna nde epai ntalo monene efutamaki. Yango nde moko na makambo. Nzambe nde aséngáká yango. Moto moko te abongaki. Moto moko te azalaki na makoki. Moto moko te akokaki kosala yango. Pe Nzambe ayaki, Ye moko, Amikómisaki moto, Abikaki bomoi ya bato, ná bamposa ya bato, pe babákaki Ye na ekulusu na Kalvári. Pe kuna, na ntango oyo Satana akanisaki ete Akosala yango te, ete Akokóma kino na suka te, Alekaki na Getsemane pe na komekama nyonso oyo moto nyonso alekaka na yango. Alekaki na yango lokola bato nyonso, kasi Ye afutaki ntalo.

⁵⁷ Pe yango nde ekotisaki molíli na mabelé. Ezalaki lokola anesthesie, mpo na lipasó. Soki monganga apesi moto anesthesie, akolalisa ye naino mpongi, liboso ápasola ye. Pe ntango Nzambe a—asalaki lipaso, mpo na Lingomba, mokili ezuaki anesthesie, bikelamo eninganaki makasi. Kokamwa te! Nzambe, kati na nzoto ya moto, azalaki kokufa. Ezalaki ngonga oyo mokili ezaláká kozela, ata bongo mingi kati na bango bayebaki yango te.

⁵⁸ Ndenge ezali kosalema lelo, bato mingi bazelaka makambo oyo, ata bongo bazali koyeba yango te. Bazali koyeba nzela ya kobima te. Bazali naino koluka bisengo pe biloko ya mokili, bazali koluka nzela ya kobima.

⁵⁹ Ezalaki, ezalaki na bilembo mingi oyo ezalaki kotalisa mokolo yango, bilílingi mingi ya minene etalisamaki liboso. Yango nde etalisamaki liboso, na elílingi ya mwana-mpate, ya ngombe, ya ebenga, pe ya biloko nyonso wana, kasi ekokaki kobuka yango te. Ekokaki kobuka nguya ya kufa te, oyo Satana akangaki mokili.

⁶⁰ Kaka mabanga oyo atámbóláká likolo na yango, ntango azalaki koyenga-yenga na mokili, sufúlu ya móto! Lusifele azalaki mwana ya ntongo, pe atámbóláká na mabelé ntango ezalaki naino volcan ya móto. Kaka mabanga oyo ekómáká mpio, ntango Yesu akufaki na Kalvári, mabelé esanzaki yango.

⁶¹ Ntalo efutamaki, pe boómbo ya Satana esukaki. Nzambe azongisaki na maboko ya moto, nzela ya kozonga na eloko oyo azalaki koluka. Asengelaki lisusu kolela te. Abetaki, ntango abukaki mokúwa ya mokongo ya Satana, kuna na Kalvári, mokúwa ya mokongo ya lisumu, ya bokono! Pe yango nde ezongisi moto nyonso ya mabelé Liboso na Nzambe, wana masumu na ye elimbisami. Aleluya! Masumu na biso elimbisámi. Satana akoki lisusu kokanga biso na molíli te, mosika na Nzambe.

⁶² Balabala monene esalemi. Telephone moko etiami wana. Singa moko ekei kino na Nkembo, moto nyonso akoki kosolola na nzela na singa yango. Soki moto atondi na masumu, yango esangisi ye na standard. Akoki kolimbisama na lisumu yango. Bobele yango te, kasi nyongo ya lisumu yango esilá kofutama.

Oh! Ozali na ntina te ya koloba: “Nabongi te.” Ya solo, obongi te, okokaki pe kobonga te. Kasi Moto oyo abongi azuaki esika na yo. Ozali na bonsómí. Ozali lisusu na ntina ya kotelengana te. Ozali lisusu na ntina ya kozala moto oyo azali koluka bisengo ya mokili oyo te.

Mpo liziba moko ezali, oyo etondi na Makila,
 Oyo ekamatami na misisa ya Emanuele,
 Soki basumuki bamibwaki na kati,
 Mbindo nyonso ya mabe na bango ekolongwa.

⁶³ Ozali na ntina ya kobunga te. Balabala monene ezali, pe Nzela, pe ebengami Nzela ya bosántu. Moto na mbindo akoleka kuna te. Mpamba te, akoleka liboso kati na liziba, na sima nde akoti kati na balabala monene.

⁶⁴ Abukaki ba-nguyá ya Satana. Afungolaki bikuke ya bolóko ya ewélo, mpo na moto nyonso oyo akangamaki, na mokili oyo, na babolóko, oyo azalaki kobanga ete soki akufi, kufa ekosala ye nini. Na Kalvári, Afungolaki bikuke ya babolóko yango, pe Akangolaki bakangami nyonso. Ozali lisusu na ntina te ete lisumu enyokola yo. Ozali lisusu na ntina te ya kotikela lisumu binama ya nzoto na yo, komela masanga, komela makáyá, kobeta masano ya mbongo, kobuka lokuta. Okoki kozala sémbó, moyengebene, pe na alimá. Pe Satana akosala yango eloko moko te, mpo osimbi singa moko, singa ya Sécurité, oyo ekangami na Libanga ya Bileko. Eloko moko te ekoki kokabola yo na Yango. Mopepe moko te ekoki kokabola yo na Yango. Eloko moko te, ata kufa yango moko te, ekoki kokabola biso na bolingo na Nzambe oyo ezali kati na Klisto Yesu. Yango nde ntina ya Kalvári.

⁶⁵ Bato oyo bazaláká na boómbo bakangolamaki. Bato oyo bazaláká kobanga kufa bakoki lisusu kobanga kufa te. Moto oyo azali na mposa makasi Engumba oyo moyemi pe motongi na yango ezali Nzambe, akoki kokota na balabala monene, pe kotombola miso na Likolo, mpo ete azali na bonsómí. Aleluya! Asikolámi. Azali lisusu na ntina ya kotelengana te, mpo ozali na makoki ya koyeba soki ozali kati na solo to te. Nzambe nde apesaka biso Bomoi. Masumu na biso esílá. Mokolo wana na Kalvári nde efutaki ntalo na yango. Ntango tomonaka nyonso wana, kokamwa te ete poète akomá:

Wana mabanga ezalaki kopasuka pe likolo
 eyindaki
 Mobikisi na ngai agumbaki motó pe Akufaki.
 Ezipeli oyo epasukaki emonisaki Nzela
 Ya bisengo ya Lola pe ya mokolo oyo ezali na
 suka te.

⁶⁶ Abraham azali lisusu na ntina ya kotelengana na ekólo mobimba te, mpo na koluka engumba moko. Mosumuki azali lisusu na ntina te ya komituna, soki akoki kobikisama to te.

Mobeli azali na ntina te ya komituna soki akoki kobikisama to te. Ezipeli oyo epasukaki, mokolo wana na Kalvári, emonisaki Nzela ya elónge mobimba. Nzambe apesi biso ba-nguyá ya Molimo na Ye, mpo tóbika na elónge likolo na makambo nyonso oyo; Asengi biso kaka ete tóndima yango. Yango nde esalemaki mokolo wana na Kalvári. Mokolo ya ndenge wana ezalá naino te. Mokolo ya ndenge wana ekozala pe te. Ezali lisusu na ntina te. Ntalo esilá kofutama, pe biso tosíkolámá. Matondi ézonga epai na Nzambe! Tosíkolámá. Ozali lisusu na likambo ya komitungisa mpo na yango te. Ntina ya kobanza-banza mpo na yango ezali lisusu te. Nyonso wana elongolámá. Ezipeli ebendaki ridó, pe tokotaki na balabala monene, mpo na komituna lisusu te, kasi mpo na kondima pe kokende bobele liboso. Tozali kokota mbala moko kino Liboso na Nzambe mpenza.

⁶⁷ Abraham ayebaki, bamosusu pe bayebaki, ntango bazalaki koluka Engumba, bayebaki ete bautaki na Esika moko boye. Likambo moko esalemáká. Bazalaki kobika na mabelé moko oyo ebébá. Mabelé ezalaki koningana. Mipepe makasi ezalaki kopepa. Bitumba pe koboma! Mbwa ya zamba pe mpate bazalaki koliána, to mbwa ya zamba azalaki kolia mpate, pe nkosi alei ngombe. Emonani ete ezali malamau te. Eloko moko ezali kotámbola malamau te. Ayebaki ete eloko moko ezalaki kotámbola malamau te. Bato, ndeko abomi ndeko; tata abomi mwana, mwana abomi tata. Eloko moko ezali kotámbola malamau te. Akómi konuna. Akómi kokufa. Akómi na suka. Bokono ekangí ye. Azali na boómbo. Banzete ezali kokóla, kasi ezangi kokufa te. Ezali kokufa. Bangomba ezali kobongwana. Mbú ezali kokauka. Mai ezali kokauka. Eloko moko ezali kotámbola malamau te. Pe azalaki koluka esika moko, Engumba oyo makambo wana ekosalema lisusu te. Ayebaki ete soki mokolo moko akokaki bobele kozonga Liboso na Ye oyo asaláká makambo nyonso malamau, akokaki kosolola na Ye mpo na kosilisa likambo yango.

⁶⁸ Oh, mosumuki, ezali litómbe monene, na ntongo ya lelo, ya koyeba ete Nzela ezali na maboko na yo sikawa. Mokolo wana na Kalvári efungolaki nzela. Mpamba te nyonso oyo bankoko bazalaki koluka pe kolukaluka, Kalvári epesaki yo yango, ofelé. Okoboya yango ndenge nini? Okoboya yango ndenge nini, mpo na kokota na ebongiseli? Okoboya yango ndenge nini, mpo na kotia eloko mosusu na esika na yango, bisengo ya mokili? Mpo na nini koyamba yango te? Ezipeli oyo epasukaki ezali kozongisa moto mbala moko kino Liboso na Nzambe, ná lisumu te likolo na ye, ata ya lolenge nini. Pe efungoli nzela liboso na ye, kino na biloko oyo alukaka: Lola, nkembo, kimia, Bomoi ya Seko, nyonso ezali mpenza liboso na ye.

⁶⁹ Mokolo wana ezalaki li—likófi ya kufa na nguya ya Satana. Esukisaki makambo nyonso.

70 Pe nakoki komona Ye kuna; Ye nde azalaki mwana-mpate ya Edene, uta na elílingi ya liboso mpenza oyo eutaki na yango.

71 Ntango Abele, na kondima, apesaki na Nzambe mbeka ya malamú, koleka oyo ya Kaina, na ntembe te akangaki ké—kékélé na kingo ya mwana-mpate yango, abendaki ye kino na libanga. Asimbaki li—libanga na loboko, lokola likongá, pe azongisaki mwa motó na ye na sima, abetaki-betaki pe akataki ye bampótá kino ete akufaki. Pe nkunza na ye esanganaki na makila na ye moko. Azalaki komipota na makila na ye. Ezalaki elílingí.

72 Kasi na mokolo wana na Kalvári, ezalaki mwana-mpate ya mokili oyo te, kasi Mwana-mpate ya Nzambe nde azalaki kokufa, komipota na Makila na Ye moko. Mokili ekataki Ye bampótá, ebetaki-betaki Ye, ebetaki Ye, ebwakelaki Ye nsoi, pe ebetaki Ye mabe, ezipaki Ye mbata, pe esalaki nyonso wana, pe Makila ezalaki kotanga na suki na Ye.

73 Ntango mwana-mpate ya Abele ekufaki, ekufaki, ezalaki koloba monoko oyo Abele akokaki kososola te. Ezalaki kolela.

74 Pe ntango Mwana-mpate ya Nzambe akufaki mokolo wana na Kalvári, Alobaki monoko moko oyo moto moko te asosolaki Ye. “Nzambe na Ngai, Nzambe na Ngai, mpo na nini Otiki Ngai?” Ezalaki Mwana-mpate ya Nzambe, oyo azokisamaki pe abetamaki.

75 Ye nde Mwana-mpate oyo Abele akanisaki, ntango amonaki Momboto ya mwasi oyo alakamaki. Ye nde Mwana-mpate oyo Daniele amonaki, oyo apikwámaki na ngomba, kozanga lisungi ya maboko. Ye nde Likalo kati na likalo, mpo na mosakoli. Nyonso oyo bamonáká liboso ekokisamaki na mokolo wana, mokolo wana na Kalvári. Yango nde ebetaki likambo ya monene oyo. Yango nde ebukaki mokongo ya Satana.

76 Ya liboso, tosengelaki koluka ntina ya mokolo yango. Ya mibale, tosengelaki komona eloko nini mokolo yango esali mpo na biso, sikawa, eloko yango esálá mpo na biso. Sikawa, ya misato, tótála eloko biso tosengelaki kosala mpo na mokolo yango. Bisó tosengelaki kosala nini?

77 Ya liboso, tosengelaki koyekola yango, mpo ezali mokolo monene, ya monene koleka mikolo nyonso. Nyongo ya lisumu efutamaki. Nguya ya Satana ebukanaki.

78 Pe sikawa tolingi komona eloko nini biso tosengelaki kosala na ngala na biso. Sikawa, na ngala na biso, ntango Yesu akufaki na Kalvári, na Kalvári mokolo wana, Afutaki bobele nyongo ya masumu na biso te, kasi Afutaki pe ntalo pe Afungolaki nzela mpo tókoka kolanda Ye; mpamba te biso, ba-Adama oyo bakweyaki, tosikolami. Ndenge Molimo ekambaki Adama (Adama ya liboso) na Molimo, oyo ezalaki na bokonzi likolo na bikelamo nyonso, na bongo biso (Adama ya mibale), to bato ya mokili, oyo tosikolami na Klisto, kobanda na mokolo

ya Kalvári, tokoki kolanda Ye. Na bongo, ntango Akufaki na Kalvári, Afungolaki nzela. Azongisaki Molimo, Molimo Mosantu, Ezongisamaki na mokili, mpo ngai ná yo tóbika na Yango. Yango nde ntina ya Kalvári mpo na biso, kolanda Ye.

⁷⁹ Ya liboso, koyekola yango, komona eloko oyo yango esalaki mpo na biso. Pe sikawa, biso tosengeli kosala nini mpo na yango? Ngai na yo tosengeli kosala nini?

⁸⁰ Sikawa, tolobaka: “Ee, na—nasepelaka na yango. Ezali mpenza malamumu.” Kasi tosengeli koyamba yango. Pe koyamba yango, ezali nde koyamba Bomoto na Ye, Klisto kati na mitema na biso.

⁸¹ Boye, tokangolami na lisumu, yango wana moniolólo ya lisumu moko te ekangi biso, ata moko te. Nzambe, ezali lokola tosálá naino lisumu ata moko te, Mbeka oyo ebongi be ebóngísá biso be. Mpamba te, Yesu alobaki: “Yango wana, bóbonga be, ndenge Tata na bino na Likolo abongá be.” Bongo, eloko mosusu ya kosala ezali te, kasi tobongi be Liboso na Nzambe.

⁸² Sikawa, wana nde epai tobungisaka esika na biso. Soki tokebi te, tomekaka kotala na sima, na oyo tozaláká. Pe na ntango nyonso oyo tozali kotala na sima, na oyo tozaláká, Mbeka yango ezali na ntina te mpo na biso. Oh, bozali komona yango te, lingomba? [Losambo balobi: “Amen.”—N.D.E.] Nakolinga te. . . Nakolinga te komeka mosala yango. Nakoki te, yo pe okoki te. Ntina ya komeka ezali te. Osílí kobunga, mpo na kobanda, na ntango nyonso oyo ozali kotala makambo osálá. Kasi kotalaka makambo oyo osálá te.

⁸³ Tala nde oyo mokolo wana na Kalvári esalaki mpo na yo. Efutaki niongo na yo. Ekataki likambo. “Ata soki masumu na bino ekómi motane lokola ngóla; ekokóma pembe lokola mbula pembe. Motane lokola makila; pembe lokola nkunza ya mpate.” Na bongo, ozali na lisumu te. Ozali mpenza na lisumu ata moko te. Ata soki osálá nini, to osali nini, ozali kaka na lisumu te. Lokola osílá koyamba Yesu Klisto lokola Mobikisi na yo, masumu na yo esílá kolimbisama. Eloko nyonso oyo *elimbisami* “elongolami pe babosani yango.”

⁸⁴ Na sima, esalaka nini? Sima na lolenge wana, ekopesa yo Molimo na Ye, mpo ólanda Ye, pe ósala ndenge Ye asalaki, mpo na bamosusu oyo bazali kolanda. Ye azalaki bobele Moto moko, Moto oyo abongi be. Apesaki bomoi na Ye, pe Apesaki yo ndakisa. Sikawa, biso tosengeli kosala nini?

⁸⁵ Sikawa, eloko ya liboso nalingi koloba, ezali, Yesu abikaki mpo na Ye moko te. Abikaki bomoi na Ye mpo na bamosusu. Yango, mpenza, nde Bomoi ya Seko. Soki olobi ete osambelaka, pe osalaka makambo ya malamumu, ezali malamumu. Kasi soki ozali kobika bomoi na yo mpo na yo moko, ozali na Bomoi ya Seko te. Bomoi ya Seko, ezali nde kobika mpo na bamosusu. Etalisaki yango polele ntango Eyaki kati na Mwana-mpate ya Nzambe.

Abikaki, pe Azalaki na Bomoï ya Seko, mpo Abikaki mpo na Ye moko te. Abikaki mpo na bamosusu. Pe ozui Bomoï ya Seko, soki oyambi mokolo wana, pe obiki lisusu mpo na yo moko te. Okómi kobika mpo na bamosusu.

⁸⁶ Moto moko alobaki: “Ndenge nini okoki kondima, kotika bato báfinga yo boye?” Ozali kobika mpo na yo moko te. Ozali kobika mpo na bamosusu, mpo ókoka kosikola moto wana. Bokómi bana. Kasi mabe na yango ezali ete lingomba ebosani ete bazali bana. Ozali mwana. Ozui esika ya Klisto. Ozali mwana, yango wana, kobika mpo na yo moko te. Bíká mpo na bamosusu.

⁸⁷ “Ee, Ndeko Branham, nakoki kobika mpo na ndeko *oyo*, mpo azali mpenza moto malamumu.” Ezali yango te.

⁸⁸ Bíká nde mpo na moto wana oyo ayinaka yo. Bíká mpo na moto wana oyo akoki koboma yo soki akokoka. Yango nde oyo basalaki Ye. Babomaki Ye, pe Akufaki, mpo Ákoka kobikisa bango. Yango nde Bomoï ya Seko. Soki, yo, yango nde ezali na motema na yo, na ntango wana, ozali kokende na Lola. Kasi okabi biloko na yo moko mbeka, osundoli yango, ndenge mpate akabaka nkunza na ye. Ozali kobwaka miso na Kalvári.

⁸⁹ Nákolikya ete likambo oyo ezali kosunga bino mpo bótélema malamumu. Yango nde tabernacle, yango nde bato nyonso basengeli kosala, ezali kososola oyo yo ozali, pe ntina na yango. Losambo, bakendeka na losambo te bobele mpo na kobeta mizíki, koyemba banzembo. Losambo ezali esika ya kosembolama. “Kosambisama ebandaka na ndako na Nzambe.”

⁹⁰ “Tosengeli komimona lokola bakúfi, pe lokola bato na bomoi mpo na Klisto.” Lisusu, Afungolaki nzela mpo tókoka komipesa mbeka mpo na mosala na Ye, kolanda Ye. Soki tolandi Ye, tokobika bomoi oyo Ye abikaki. Ezali kitoko mpenza.

⁹¹ Yesu alobaki, pe Alobelaki yango. Tika nápésa bino mwa biteni na ntina na yango. Bóyóka malamumu. Bózanga yango te. Yesu alobaki, na Mokolo wana Akokabola bato, lokola ba-mpate ná bantaba. Pe Akoloba na bantaba: “Bótélema na loboko ya mwasi.” Pe na ba-mpate: “Bótélema na loboko ya mobali.”

⁹² Pe Alobaki na bantaba: “Bókende mosika na Ngai. Mpo, Nazalaki na nzala, kasi bopesaki Ngai bilei te. Nazalaki na bolóko, kasi boyaki kotala Ngai te. Nazalaki bolumbu, kasi bolatisaki Ngai te. Nazalaki na mposa ya mai, kasi bopesaki ngai mai ya komela te. Nazalaki na bokono, kasi boyaki kotala Ngai te. Na bongo, bókende mosika na Ngai.”

⁹³ Pe na ba-mpate Alobaki: “Nazalaki na nzala, pe bopesaki Ngai bilei. Nazalaki bolumbu, pe bopesaki Ngai bilamba. Nazalaki na bokono, pe bosungaki Ngai.”

⁹⁴ Pe bótala. Bózanga kosimba likambo oyo te, lingomba. Bóbómbo yango na mitema na bino, mpo na libela. Esalemaki mpenza na kozanga koyeba! Bato basalaka yango lokola lotómo

te. Moto oyo apesi yo eloko, mpo atindami kosala yango, moto oyo apesi yo bilei mpo atindami kosala yango, azali na likanisi ya moyími. Esengeli kozala bomoi na yo mpenza, eloko oyo yo osali mpenza.

⁹⁵ Ekamwisaki ba-mpate yango mingi, na lolenge ete balobaki: “Nkolo, Ntango nini Ozalaki na nzala? Pe biso toboyaki koleisa Yo. . . Ntango nini Ozalaki na nzala, pe biso toleisaki Yo? Ntango nini Ozalaki bolumbu, pe biso topesaki Yo bilamba? Ntango nini Ozalaki na mposa ya mai, pe biso topesaki Yo mai ya komela? Ntango nini Ozalaki na bokono, pe biso tosungaki Yo?”

⁹⁶ Ezalaki kosalema yango moko mpenza uta na bolingo, bobele Bomoi na Yo nde ezalaki kobika kati na bango. Nzambe, tika ete bato bámóna oyo Kalvári esalaki mpo na biso, yango moko mpenza.

“Ezalaki na ntango nini, Nkolo? Toyebaki yango ata moke te.”

⁹⁷ Bótala ndenge Yesu abalukaki pe alobaki: “Mbala nyonso bosalaki yango epai na bango, bosalaki yango nde epai na Ngai.”

⁹⁸ Bomoi ya moyími te; likanisi ya mibale te. Okanisi yango te; kasi okúfá mpenza na makambo ya mokili oyo, pe ozali mpenza na bomoi na kati na Klisto, pe ozali mpenza kotábola na balabala monene, na lolenge ete makambo yango ekómá kosalema yango moko. Osali yango kaka. Okoloba te: “Ee, sikawa, Nkolo alingaki, Nkolo nde alingi ete násala yango.” Ezali bongo te. Ozali mpenza eteni na Ye. Molimo na Ye ezali na kati na yo, pe ozali kosala ndenge Ye azalaki kosala. Ah! Bósosola yango malamumu.

⁹⁹ “Nzela oyo ekoki komonana malamumu epai na moto, kasi na suka na yango, ezali nzela ya kufa.”

¹⁰⁰ “Ezali te baoyo nyonso balobaka: ‘Nkolo, Nkolo,’ nde bakokota, kasi bobele baoyo basalaka mokano ya Tata na Ngai,” uta na nse ya mitema na bango, na motema moko.

¹⁰¹ Sikawa, mokolo wana na Kalvári efutaki ntalo yango, mpo tókóma ndenge wana.

¹⁰² Okoloba te: “Boyebi, mokolo moko mokúfeli-mobali Jones azalaki. . . Azangaki makála, pe ngai nakendaki kosombela ye makála. Nayebisi bino, namonaki ndeko mobali moko oyo azalaki na bosenga ya kazáka, pe ngai nakendaki kosombela ye kazáka. Nzambe ápambolama! Nazali Moklisto.” Oh! la la! Yo moyími oyo, mobólá, moto na mawa. Ozali moto ya bilongi mibale.

¹⁰³ “Kotika te ete loboko ya mobali éyeba likambo loboko ya mwasi ezali kosala, pe loboko ya mwasi éyeba likambo loboko ya mobali ezali kosala.” Okúfá mpenza na pete kati na Klisto, na lolenge ete ozali kosala yango, ata ndenge nini. Ezali lolenge na yo. Ezali ezaleli na yo. Osali yango kaka. Ezali bobele Bomoi oyo

ezali kobika kati na yo. Omipésá mobimba na Molimo yango, pe Ekómá kobika Yango moko kati na yo. Oh, ozali koyoka Molimo oyo epámbolami, Bomoï wana! “Ngai nde nazali kobika te,” ndenge Polo alobaki, “kasi Klisto nde azali kobika kati na ngai,” kaka yango moko mpenza.

¹⁰⁴ “Ee, naye bisi yo, Ndeko Branham, biso tozali Baklisto awa. Tosungaka bato *oyo*. Tosungaka bato *oyo kuna*.” Oh! la la! Sóni na bino. Oyo wana ezali Boklisto te.

¹⁰⁵ Boklisto, makambo esengeli mpenza kosalema yango moko. Esengeli kosalema. Pe obosani mpenza, nyonso ya koloba: “Ngai te.” Kende, sala yango.

¹⁰⁶ Klisto asundolaki mpenza Bomoï na Ye mobimba epai na Nzambe. Amikabaki, lokola mosali mpenza, mpo na bato. Akabaki Bomoï na Ye, na motema moko. Atindamaki kosala yango te. Asalaki yango na mitema mibale te. Alobaki te: “Sikawa, bandeko, bino nyonso bosengeli komemia Ngai mingi mpenza, mpo Nayeï kokufela bino.” Alobelaki yango ata moke te. Akufaki kaka, mpo ezalaki Nzambe kati na Ye.

¹⁰⁷ Ezali Nzambe kati na yo, ezali Nzambe kati na ngai, nde asalaka ete tótala bamosusu. Ba-mpate, na ngámbo moko.

¹⁰⁸ Moko na bango akoloba: “Ee, Nkolo, nasalaki likambo *boye*. Pe, Nkolo, nasalaki likambo oyo *kuna*.”

¹⁰⁹ Alobaki: “Bókende mosika na Ngai, bino basali ya masumu na nko. Naye bino ata moke te.”

¹¹⁰ Soki lingomba ekoki kososola makambo ya mobokó wana, ete ezali eloko oyo ozali koluka kosala te, oyo ozali kosala na makasi na yo moko te. Ezali eloko oyo ebótámí kati na yo.

¹¹¹ Limbisa ngai, moninga na ngai Pantekotiste. Ngai nazali pantekotiste. Kasi baninga na ngai ba-Pantekotiste bakómi na esika oyo esengeli mi—mizíki ébeta mbangu-mbangu, lokito ya ba-orkéstre, to kobeta maboko, to kobeta mbonda, mpo na kogángisa bato. Oyo wana ezali bobele kotúntuka. Babetaka mindúle liboso ete bákende na etumba. Bamemaka bato na kotúntuka ya etumba. Nandimaka mizíki. Nandimaka kobeta maboko. Kasi, nandimaka makambo yango. Ezali mpenza ya solo. Tosengeli kozala na yango.

¹¹² Kasi botiki makambo ya motuya pembeni, ezali bomoi wana ya komikaba mbeka, oyo Nzambe abikaka kati na bino, na pete nyonso, kosala bolamu mpo ezali malamú. Kokende kaka liboso, kokanisa ata eloko moko te mpo na yango. Kobíkela yango kaka. Na sima, otali, omoni oyo ezali kosalema. Yo, kaka . . . yo . . . Ozali na balabala monene. Yango nde ntina ya Kalvári mpo na yo, na balabala monene, oyo efungwamaki mokolo wana mpo na yo.

¹¹³ Sikawa, sikawa bomikanisela, okoki kozala ndambo ntaba pe ndambo mpate te. Basanganaka te.

114 Sikawa, bato mingi balobaka: “Iyo, oyebi? Na etónge na biso, tozali na mabongisi moko. Bisó, tosungaka babólá. Tosalaka *boye*.” Ezali malamú, kasi bozali komikumisa bino moko mpo na yango. Bósálaka bongo te.

115 “Pesaka makabo na yo ya mawa na nkúku,” elobaki Yesu. Na pete nyonso, ezali eloko moko kati na yo, ezali bobele lokola kokende kozua mai ya komela. Oyoki mposa ya mai. Soki mozalani na yo ayoki mposa ya mai, okanisi pe ye. Boséngá ya mozalani na yo, okanisi ye, ndenge okanisaka mpo na boséngá na yo moko. Pe ozali kokipé yango ata moke te. Okóbi kaka kobika.

Sikawa, okoki kozala ndambo mpate pe ndambo ntaba te.

116 Na bongo soki olobi: “Ee, lingomba na biso ezali na mabongisi moko. Tokabelaka babólá, pe tosalaka *boye*, pe tosalaka *boye*, pe tosalaka lisusu *boye*.”

117 Soki bozali na yango kasi bozangi oyo mosusu, Bomoí ya Klisto kati na bino, bozali mpenza kosala mosala ya mpúnda. Yesu... Polo alobaki, na Bakolinti ya Liboso 13: “Ata nakabí biloko na ngai nyonso mpo na koleisa babólá, pe nakabí nzoto na ngai mpo bátumba yango lokola mbeka, nazui litomba te.”

118 Sikawa, ezali matata, kasi ezali Solo. Bosengeli kokóma na likambo yango, koyeba oyo Kalvári esalaki mpo na bino. Totalaka yango, pe tolobaka: “Oh, iyo, ezali malamú.” Ezali yango te. Soki Mwana na Nzambe wana asengelaki kokende na Kalvári, mpo na kobakama na ekulusu, mwana nyonso oyo akoya asengeli kokende na Kalvári. Asengeli pe kozala na Kalvári. Yo osengeli kozala na mokolo wana ya Kalvári. Ngai nasengeli kozala na mokolo wana ya Kalvári. Yango nde esukisaka likambo ya lisumu. Ezali likambo ya kopesa motei mbote ya loboko te; ezali likambo ya koningisama te mpo na kokota na lingomba; bakotaka pe na mokanda te, bakotaka pe na bolakeli te. Kasi bakotaka nde na Mbótámá. Apesaki mokanda te. Apesaki bolakeli te. Apesaki nde Mbótámá. Tokótaka nde bongo. Na sima, kobanda wana, na pete nyonso, tozali kobika bomoi ya Baklisto.

119 Sikawa, likambo mosusu. Ndambo ntaba, ndambo mpate, ezalaka te. To ozali ntaba, to ozali mpate. Ozali ndambo ntaba pe ndambo mpate te. To ozali ntaba, to ozali mpate.

120 Sikawa, soki osalaka bobele makambo ya malamú, pe okanisi ete okoki kokota, mpo na yango, na bongo ntina ya mokolo ya Kalvári elingaki kozala te. Mobeko nde epesaki yango. Kasi, lokola esengaki ete mokolo ya Kalvári ézala, ezalaki mpo na kokotisa yango, mpo tózala bobele bandimi ya lingomba te, kasi tózala bana-mibali pe bana-basi ya Nzambe. Yango nde oyo mokolo ya Kalvári ezalaki. Yango nde ntina na yango mpo na yo, mpo ókoka kosala, kolanda, pe kobika lokola Yesu.

121 Sikawa, ebale etiólaka pe enanaka na mbala moko te. Ebale etiólaka bobele na ngámbo moko. Molimo na Nzame pe etiólaka bobele na ngámbo moko. Esanganaka ná biloko mosusu te. Etiólaka na ngámbo moko.

122 Bótála Yesu, mpo na kosilisa. Yesu alobaki: “Misala Nazali kosala, bino pe bokosala yango, pe bokosala ya minene koleka oyo, mpo Nazali kokende na Tata na Ngai.”

123 Nazali koloba boye mpenza na losambo oyo te. Bino bozali kososola. Kasi Mateya oyo etiamaka na ba-bande. Bato nkóto na nkóto bayokaka yango, na mokili mobimba.

124 Nakopesa eyano na motuna wana mpo na motóngi, sikawa. Mbala mingi bato balobaka na ngai... bayebisaka ngai. Balobaka: “Ee, ondimaka Biblia? Yesu alobaki: ‘Misala oyo Nazali kosala, bino pe bokosala yango, pe bokosala ya minene koleka oyo, mpo Nazali kokende na Tata na Ngai.’”

125 Ndenge nini okómi mabe boye, misie? Ndenge nini okei kotelengana mosika na lisosoli boye, ná makindó na yo ya mayele ya motó, ná lolenge na yo ya komona makambo nyonso na bongó? Moninga na ngai malamau, yo oyo obúngá, ozali kososola te ete Biblia oyo elimbolamaka nde na molimo?

126 Yesu atondaki Tata ndenge Abombaki Yango na miso ya bato ya mayele, oyo batángá mingi, bato na bwanya, pe ya mayele, pe Asepelaki komonisa Yango epai na bana mike oyo bakolinga koya na Kalvári.

127 Sikawa, bótála. Yesu alobaki. Bótála ndenge Alobaki yango. “Misala oyo Nazali kosala,” Azali kosala yango sikasikawa. “Misala oyo Nazali kosala sikawa, kobikisa babeli, kosekwisa bakufi, kofungola miso ya bakufi miso, misala yango, bino pe bokosala yango. Bokosala yango soki bondimeli Ngai. Bokosala misala yango. Bongo, bokosala ya minene koleka oyo, mpo Nazali kokende na Tata na Ngai.”

128 “Etikali moke, bamokili bakomona Ngai lisusu te, kasi bino bokomona Ngai. Nakozala elongo na bino, ata na kati na bino, kino na suka ya mokili. Nakotika bino bitiké te. Nakobondela Tata; Akotindela bino Mobondisi mosusu, elingi koloba Molimo Mosantu, oyo bamokili bakoki koyamba te; kasi, bino bokoki koyamba Ye.”

129 Sikawa bótála. Misala ya “minene koleka”, ezalaki ya kozala na Nguya kati na Lingomba, kaka mpo na kobikisa babeli na libondeli te, kobengana milimo mabe na libondeli te, kasi kokabola Bomoi ya Seko na bandimi. Molimo Mosantu elingaki koya, pe elingaki kopesama na maboko ya Lingomba, mpo na kokabola Bomoi. Oh! Yango nde ntina ya Kalvári. Ezuaki mibali pe basi oyo ya mpamba, oyo bazángá ntina, pe etómbolaki bango kino na esika moko boye, mpo bákóma bana mibali pe bana basi ya Nzambe, mpo bábíkisa babeli pe bákabola Bomoi ya Seko;

na kopesa Molimo Mosantu epai na bandimi ya botósi, mibali oyo bazaláká bazangi kondima, bakomisami bandimi, pe bazali kokabola Bomoï ya Seko ya molimo. Ezali mpenza likambo ya monene koleka, koloba. . .

¹³⁰ Mwasi mobeli oyo alali awa, nakoki kobondela libondeli ya kondima pe akobikisama. Ezali likambo ya monene. Yango nde Ye azalaki kosala na eleko wana.

¹³¹ “Kasi,” Alobaki, “bokosala ya minene koleka oyo. Nakopesa bino Nguya, mpo na kosekwisa ye kaka mpo na mwa ntango te, kasi mpo na kopesa ye Bomoï ya Seko, oyo ekozala Seko, mpo na libela.” Babólá, bakúfi miso, bato na bolózi, ndenge nini bozali komona yango te? Bozali komona oyo ya “monene koleka” ezali te? Yango nde likambo ya monene koleka oyo ekokaki kosalema, ezalaki ya kokabola Bomoï ya Seko na bato. Bomoï ya Seko ezali nini? Bomoï oyo Ye abikaki, Bomoï oyo ezalaki kati na Ye, pesa Yango na bamosusu. Moto akoki kosala yango? Mwana na Nzambe akoki.

¹³² Yesu alobaki: “Baoyo bino bokolimbisa masumu na bango, ekolimbisamela bango; baoyo bino bokolimbisa te, ekolimbisamela bango te.”

¹³³ Sikawa na esika yango nde lingomba Katoliko ná mangomba mosusu ebele basalaki libunga na bango ya monene. Bakendeke koloba: “Nalimbisi masumu na yo.” Ezalaki bongo te.

¹³⁴ Ndenge nini bazalaki kolimbisama na masumu, na Biblia? Petelo apesaki eyano na motuna yango, na Mokolo ya Pantekote. Balobaki: “Tokoki kosala nini mpo tóbikisama? Ndenge nini biso tokoki kozua Oyo bino nyonso bozali na yango?” Akomáki ordonance. Ayebisaki bango eloko basengelaki kosala.

¹³⁵ Alobaki: “Bóbóngola mitema, moko na moko na bino, epai na Nzambe, pe bózua libatishi na Nkombo na Yesu Klisto.” Mpo na nini? Bolimbisi ya masumu na bino. Yango nde misala ya “minene koleka”.

¹³⁶ Bato boni, bino batei na ntongo oyo, bato boni, bino baoyo bazali koyoka Liloba na ngai na bande, balingi kokende na Kalvári na ntongo oyo? Pe kotala likambo oyo Nzambe asalaki kuna mpo na bino. Pe kosundola bindimeli ya bibongiseli na bino, pe koteya Nsango Malamu. Aleluya! Ezali sikawa na maboko na bino. Bokosala na Yango nini?

¹³⁷ “Mpamba te kobóngola motema pe bolimbisi ya masumu esengeli koteyama na Nkombo na Ye, na mokili mobimba, kobanda na Yelusaleme.” Aleluya! Nkembo! Yango mpenza.

¹³⁸ Kalvári ezali na ntina nini mpo na yo? Mokolo wana esalaki nini mpo na yo? Etóndisaki yo na líkindo moko boye? Ekómisaki yo moto ya loléndo? To ekómisaki yo Moklisto, oyo amipésá mobimba? Aleluya!

¹³⁹ Masumu, elimbisami! “Bino bokosala misala ya minene koleka oyo.” Bomoni “bino” wana ezali banani, boye te? “Misala ya minene koleka oyo,” kolimbisa masumu, na Nkombo na Yesu Klisto.

¹⁴⁰ Kasi na nzela na bindimeli pe bibongiseli, pe bongo na bongo, yango nde ekangi bino na esika moko boye, oyo bozali kokoba kosalela mokili. Bóyébisa ngai mobali nini, bóyébisa ngai mwasi nini, oyo akoki koya na Kalvári bongo áluka kokóma moto monene mpo moto moko alobi likambo moko boye. Bóyébisa ngai ndenge nini bokoki kotala Kalvári na miso, na póle na yango oyo esengeli, mokolo wana na Kalvári. Ndenge nini okoki kozua mokolo na yo ya Kalvári, bongo óbima kuna moto na loléndo? Ndenge nini okoki kobima kuna moómbo ya ebongiseli moko boye, pe koteya malakisi ya bato? Mpo na nini epesi yo komikitisa liboso na Liloba na Nzambe te? Soki esalemi ete okei kuna, okobima kuna moto na komikitisa. Ndenge nini okoki kolinga kozala moto monene na ebongiseli na bino, ná lokumu nyonso, na ntango oyo Yesu Klisto, Mwana na Nzambe, amikitisaki kino na nzoto oyo ezokisamaki ba-mpota minene, na elongi oyo babwakelaki nsoi, kino na nsoni pe kosambwisama? Pe balongolaki Ye bilamba, pe babakaki Ye na ekulusu, na miso ya bamokili. “Abangaki nsoni te.” Ndenge nini okoki kokende na Kalvári, bongo ózónga awa, okeseni na oyo Ye azalaki, moto oyo asámbwá pe ya nsoni?

“Oh,” okoloba, “bakobengana ngai.” Bábengana yo.

¹⁴¹ Zua mokolo na yo na Kalvári, Nzambe akosala na yo na ndenge na Ye. Tika názóngela maloba yango. Zua mokolo na yo na Kalvári, Nzambe akosala na yo na ndenge na Ye.

Tóbóndela.

¹⁴² Nkolo, E Nzambe, memá biso nyonso na Kalvári sikasikawa. Sungá biso tókabwana na biso moko, Nkolo, na kobanga bato, kobanga oyo moto mosusu akoloba. Kasi, mokili mobimba esekaki Ye, etiolaki Ye. Kasi Atósaki, kino na kufa. Atósaki, kino na kosámbwa. Atósaki, ata bokonzi ya etúka.

¹⁴³ Pe tososoli ete ntango Satana abetaki mokili oyo, akómaki mokonzi pe moyangeli na mabelé oyo. Atátólaki yango liboso na Nkolo na biso, pe alobaki: “Ba-bokonzi oyo ezali ya ngai. Nakosala na yango ndenge nalingi.” Pe tososoli ete, bandá mokolo wana kino lelo, mokili oyo, na nse na elakeli mabe, ekezami na ye oyo alakelaki yango mabe.

Kasi, Nzambe, E Nzambe, biso tozali kosalela Bokonzi oyo elakelami mabe te.

¹⁴⁴ Tata, Nzambe, ezali mpenza kitoko mingi, ndenge Osali makambo ya minene na—na oyo etali ba-filme lelo. Ndenge Opesi nzela ete ba-filme ya minene, lokola *Mibeko Zomi*, pe bongo na bongo, ésalema, mpo mibali pe basi bámóna, baoyo balingaka

ata kokóma na ekuke ya losambo te, kasi Osali ete bámóna ndenge ezalaka. Nzela ya Nzambe ezali nzela oyo ebóyamaka na bato ya mokili. Mpo tozali lokola . . . Tozali kokota kino na Russie oyo ekonzami na communisme.

¹⁴⁵ Tozali na mokili oyo, kasi tozali bato ya mokili oyo te. Tosílá kokende na Kalvári. Tosílá komibáka na ekulusu, mpo na Bokonzi na Nzambe, mpo tózala moko na baoyo ya Ye. Ata soki mokili elobi nini, biso tokotámbola elongo na mwa batiolami ya Nkolo. Tozali kokende liboso kino na lisekwa, pe tondimi ete ntango yango ekómi pene, Nkolo, oyo tokosekwa kati na Bokonzi oyo ekoyangela mokili oyo. Ndenge Daniele amonaki yango liboso, pe epanzaki mokili mobimba, lokola mposu ya lóso oyo ememami na mopepe, na esika bazali kotuta yango na eleko ya eté. Kasi, ngomba, Libanga yango ekómaki ngomba monene pe ezipaki mokili. Libanga yango ekoya. E Nzambe, tolingi kozala eteni na yango. Tika ete tómibóya, tómema ekulusu na biso mokolo na mokolo, tóbika mpo na Klisto, tóbika mpo na bamosusu. Kokisa yango, Nkolo.

¹⁴⁶ Soki bato bazali awa na ntongo ya lelo, oyo bayebi Ye te, lokola Mobikisi, pe balingi ete tókanisa bango na libondeli ya suka, pe bolingi ete lelo ézala mokolo na bino ya Kalvári, bótómbola maboko mpo na koloba: “Bóndélá mpo na ngai, Ndeko Branham. Nalingi koyeba Ye lokola Mobikisi na ngai.” Nzambe ápambola yo, elenge mobali. Moto mosusu azali? Nzambe ápambola yo, ndeko na ngai kuna na suka.

¹⁴⁷ Moto mosusu akoki kozala? Oyo akoloba: “Nalingi koyeba Ye. Nalingi ete lelo ézala mokolo ya Kalvári, mpo na ngai. Nakómi na suka. Ntina nini nátiola eloko mpenza oyo nabótámá mpo násala? Nabótámá, nabótámá mpo názala mwana na Nzambe, pe ngai oyo nakangami na biloko ya mokili. Nzambe, tika ete nábákama na ekulusu lelo. Tika ete námibáka na ekulusu, lelo, ngai moko ná makanisi na ngai, mpo nábíka elongo na Klisto, pe nábíka mpo na bamosusu. Ata soki basali ngai nini, mpo na kotiola ngai, konyokola ngai, pe koloba mabe ya ndenge na ndenge na ntina na ngai, pe nyonso wana, tika ete nákóba kotámbola na komikitisa, na bopolo, lokola mwana-mpate, ndenge Ye asalaki. Pe mokolo moko, Alakaki ete Akosekwisa ngai, na Mokolo ya suka. Nazali kozela Mokolo yango.” Maboko mosusu ezali oyo ekoki kotómbwama? Nzambe ápambola yo kuna na suka, ná yo. Malamu. Bamosusu oyo . . . Nzambe ápambola yo. Nzambe ápambola yo. Bamosusu, liboso ete tóbondela.

¹⁴⁸ Tata na biso na Likolo, elobamaki, ntango Petelo ateyaki na Mokolo ya Pentekote ete: “Baoyo nyonso bandimaki babakisamaki na Lingomba.” Bandimaki mpenza na motema mobimba. Bato oyo bauti kotombola maboko, nandimi ete bandimi na motema mobimba. Pe soki ezali bongo, mai

ya libatishi ezali kozela awa. Balingi ete masumu na bango élimbisama. Moto moko azali awa oyo akoki kobatisha bango na Nkombo wana, Nkombo bobele moko, oyo ezali na nse ya Likolo, oyo epésámélá bato, oyo tosengeli kobika na yango.

¹⁴⁹ Mpamba te, ndenge natángaki Makomi, eleki mwa ntango, ete, “Kobóngola motema pe bolimbisi ya masumu esengeli koteyama na Nkombo na Ye, na mokili mobimba, kobanda na Yelusaleme.” Pe na Yelusaleme, ntango kobóngola motema pe bolimbisi ya masumu eteyamaki, ntómá alobelaki bango na ntina na Makomi, pe alobaki ete basengeli “liboso kobóngola mitema, na sima bábatisama na Nkombo na Yesu Klisto.” Oyo wana ezalaki mosala ya motei. Mpo bango bábóngola mitema, pe ye ábátisha bango mpo na bolimbisi ya masumu na bango. “Baoyo bokolimbisa masumu na bango, bakolimbisama; baoyo bokolimbisa te, bakolimbisama te.”

¹⁵⁰ Tata, ndenge nini mokili emikotisasi na mobulu ya lolenge oyo bazali na yango? Mpo na nini te kondima Nsango-malamu ya pete boye? Pe bazali ata kokotisa biloko mosusu na esika na yango: bankombo ya lokuta, libatishi ya lokuta, mabátishi ya lokuta ya Molimo Mosantu, kopesa mbote ya loboko na batei, kosalela bibiangelo ya Tata, Mwana, Molimo Mosantu, oyo ezali ata na esika moko te kati na Makomi; ezali mokanda oyo esalemi na bato ya Roma, ezali malakisi ya Baklisto te, na esika moko te kati na Biblia. Bolimbisi ya masumu ekoki kosalema na bibiangelo te, kasi na Nkombo na Yesu Klisto.

¹⁵¹ Sikawa, Tata, toyebi ete bato bayebi yango te. Banzela na Yo ezalaka ntango nyonso ndenge wana. Kasi tika ete mibali pe basi, na ntongo ya lelo, báyá na mokolo yango, mokolo wana na Kalvári. Kuna, Yesu atiolaki mokolo yango, nsoni yango, ya kotikalala bolumbu, ya kozokisama ba-mpota, ya kobwakelama nsoi, pe ya kotiolama; na mokili mobimba, na lingomba, na bato oyo basengelaki kolinga Ye. Ata bongo, na nyonso wana, Afungolaki monoko te, pe Akendeki kokufela bato yango, oyo bazalaki kotiola Ye.

¹⁵² Nzambe, memá biso na Kalvári na ntongo oyo. Pe soki balobi ete tobeli libómá, balobi ete tososoli Makomi mabe, nyonso oyo balingi koloba, Nzambe, bakoki te kotelema Liboso na Nzambe mpo na koloba ete ezali lokuta.

Bakoki kozipa masumu na bango na nzela na Biblia te. Biblia ezali nde kotalisa masumu na bango polélé: kozanga kondima na bango; ya koyebana, kosala makambo lokola bato nyonso. Tika ete báyá na Kalvári na ntongo ya lelo.

¹⁵³ “Pe kobanda na Yelusaleme; kobóngola motema pe bolimbisi ya masumu esengeli koteyama na Nkombo na Ye na bikólo nyonso, kobanda na Yelusaleme.”

Tika ete bango pe bálanda nzela wana ya kobákama na ekulusu, ya kozokisama ba-mpota, ya kobwakelama nsoi, ya

kotiolama, ya kofingama na ndenge nyonso bakoki kofingama lokola batomboki ya basambeli, babúki ya mangomba, na ndenge nyonso bakolinga kofinga bango.

Nkolo, tika ete, na ntongo ya lelo, tóbanda kotámbola elongo na mwa batiolami ya Nkolo. Tika ete tótámbola lokola bantóma batámbolaki, tóbaluka na ngámbo ya mobali to ya mwasi te, pe tósálela Nzambe na mitema malamau. Kokisa yango, Tata.

¹⁵⁴ Sikawa, bikisa babéli pe bato na bolózi oyo bakoya na molongo ya mabondeli. Tika ete baoyo batombolaki maboko, bábóngola mitema, sikasikawa, na mitema na bango. Tika ete baoyo batikalaki na sima ntango molai, bákende noki-noki na mai pe bázua bolimbisi ya masumu na bango na Nkombo ya Mbeka, Yesu Klisto, Mwana na Nzambe. Amen.

Kuna na ekulusu epai Mobikisi na ngai
akufaki,
Kuna nde nagángaki mpo na bolimbisi ya
masumu;
Kuna nde Makila etiamaki na motema na ngai;
Nkembo na Nkombo . . .

Nkembo na Nkombo na Ye!
Oh, nkembo na Nkombo na Ye!
Oh, kuna nde Makila etiamaki na motema na
ngai;
Nkembo na Nkombo na Ye!

Nabikisami na masumu na ndenge ya
kokamwa mpenza, (Ndenge nini?)
Yesu afandi na kati, na bopolo mpenza,
Kuna na ekulusu epai A . . . (Zalá moko na
baoyo ya Ye.) na kati;
Oh, nkembo na Nkombo na Ye!

Nkembo na Nkombo na Ye!
Nkembo na Nkombo na Ye! (Nkombo ya
motuya.)
Oh, kuna . . . Makila etiamaki na motema;
Nkembo na Nkombo . . .

¹⁵⁵ Esali bino eloko moko boye te? Epetoli bino. Etii elikia kati na bino: Bomoi, Bomoi ya Seko.

¹⁵⁶ “Kobákama na ekulusu elongo na Klisto” ezali nini? Ezali kobika mpo na bamosusu. Bamosusu ya ndenge nini? Baoyo bayinaka yo, baoyo bakolinga yo te, baoyo bakotiola yo: biká mpo na bango, zalá elongo na bango, lingá bango, “bóndela mpo na baoyo bazali konyokola bino, kokósela bino makambo ya ndenge na ndenge, mpo na Nkombo na Ngai. Banyokolaki basakoli oyo bayaki liboso na bino.”

157 Nakanisaki ete liteya oyo ekosunga losambo na ntongo oyo, mpo bómona ete tosengeli na Kalvári, tosengeli na kobákama na ekulusu.

158 Sikawa nyonso wana esali nini? Nyonso wana esilá kofutama. Ndeko mwasi oyo afandi na kiti ya bibósono, mpo na bato oyo bazali awa, baoyo bazali na bokono pe na bolózi: Nyonso wana esilá kofutama; eloko bobele moko oyo bosengeli kosala, ezali ete bóndima ete ezali ya bino; bóyamba yango kaka ndenge wana, pe bokobikisama.

159 Bómikanisela: Sikawa ezali nini? Bokoki kokende na mokili mobimba, koteya Nsango-malamu, kobikisa babeli; pe kokabola Bomoi ya Seko.

Ekoleka monene ndenge nini: ya, mobali oyo alali awa, azali na—na tumeur, cancer, to nini. (Tomóná Ye mbala mingi kokabola mapamboli na Ye pe kobikisa mibali, kobikisa basi, lobiko nkóto zomi mbala nkóto, oyo ekweaka te, na mokili mobimba, bomoni, kotélemisa bango uta na mwa ba-mbéto, ba-mbéto ya babeli; batikalaki bobele mikúwa-mikúwa, cancer eliaki bango; lelo oyo, bazali malamumu, na nzoto kólóngónu.) “Misala oyo Nazali kosala bino pe bokosala yango; kasi bino bokosala ya minene koleka oyo,”: “koleka oyo,” ya solo.

Nini? Napesaki bango bomoi molai, na nzela na Nkombo na Yesu, mpo na kobakisa mwa mikolo na molai ya bomoi na bango.

Kasi, “Bino bokosala koleka oyo: bokopesa bango Bomoi ya Seko na nzela na Nkombo na Ngai.” Fiuu!

160 Mpo na nini okoyoka nsoni mpo na Nkombo ya motuya wana? Mpo na nini bato bakímaka yango pe bamibendaka mosika na yango? Ezali zabolo. Ya solo.

161 “Kobóngola motema pe bolimbisi ya masumu esengeli koteyama na Nkombo na Ye na mokili mobimba, kobanda na Yelusaleme.” Kuna nde esika Nsango ebandaki. Boye te? “Kobóngola motema pe bolimbisi ya masumu ekoteyama na Nkombo na Ye, kobanda na Yelusaleme.”

162 Sikawa, liboso, tokosala ndenge Ye asalaki: kobondela mpo na kobikisa babeli.

163 Na sima, tokozua likabo ya monene: Mai ebelemi, awa na sima, mpo na oyo alingi kobatisama (bilamba ya basi ezali awa, bilamba ya mibali ezali awa), ebelemi mpo masumu na bino élímbisama; mpamba te bómikanisela, ete masumu na bino ekoki kolimbisama bobele kokokana na malakisi ya Biblia. “Mpamba te Nkombo mosusu ezali te na nse na Likolo, oyo epesameli bato, oyo bosengeli kobikisama na yango.”

164 Polo akutanaki na bato oyo basiláká kobatisama. Pe bazalaki kogánga, bazalaki na elóna. Alobaki: “Bozuaki libatishi nini?”

Balobaki: “Libatishi ya Yoane.”

Alobaki: “Yoane abatisaki mpo na kobóngola mitema.” Sikawa, bósósola likambo oyo: mpo na kobóngola mitema, kasi mpo na bolimbisi ya masumu te. Bato boni basosoli yango? Mpo na bolimbisi ya masumu te. Babátisamaki malam, mpo na kobóngola mitema. Babongolaki mitema: “Iyo, misie, nasílá kobóngola motema. Ngai, nandimi ete Azali koya.” Babatisamaki *mpo na kobóngola mitema*; elingi koloba, “kondimela Nkoló Yesu Klisto.”

¹⁶⁵ Na sima, ntango bayokaki likambo *oyo* (ete Mbeka esilaki koya), babatisamaki lisusu, na Nkombo na Yesu Klisto. Na ntango wana nde Molimo Mosantu epesamelaki bango, ntango atielaki bango maboko; pe balobaki minoko na sika pe basakolaki.

¹⁶⁶ Sikawa, bokobóngola Makomi oyo ndenge nini? Bólakisa bobele na esika moko na Biblia, epai moto moko asílá kolimbisama na masumu na ye, na Kondimana na Sika, pe oyo asílá kobatisama na lolenge mosusu libanda na Nkombo na Yesu Klisto.

¹⁶⁷ Bólakisa ngai esika bobele moko na Biblia, epai moto moko asílá kobatisama na Nkombo ya Tata, Mwana, Molimo Mosantu. To, bómemela ngai na biró, histoire ya lingomba, oyo etalisi epai moto moko asílá kobatisama na Nkombo ya Tata, Mwana pe Molimo Mosantu, liboso na mibu nkama misato na mwa ndambo, sima na liwa ya ntóma ya suka, ntango lingomba Katoliko ekómaki ebongiseli.

¹⁶⁸ Sikawa, nazali na buku ya *Batata ya Liboso ya Nicé*, pe ba . . . ya ba-historien ndenge na ndenge, pe nyonso wana, na biró na ngai: histoire ya kala pe ya búle koleka na mokili mobimba; ba-ndangá oyo ekweaka te bobele moko oyo tozali na yango.

¹⁶⁹ Bótánga zulunále ya *Mopaya na Biso ya Lomingo*, to katekísimo ya lingomba Katoliko, pe bótánga yango malam, oyo balobi: “Ntango mosusu ba-Protestant mosusu bakobíkisama, mpo bazali mpenza kotósa malakisi ya Katoliko: Mpamba te Biblia na bango elobi: ‘bóbátisa na Nkombo na Yesu Klisto,’ kasi biso tolongoli nkembo ya ‘Nkombo na Yesu,’ pe totii ‘Tata, Mwana, Molimo Mosantu,’ pe bango bandimi yango.”

Sikawa, bólakisa ngai Likomi moko oyo ekesani na yango.

¹⁷⁰ Pe, yango mpenza. Ata bongo, mokili ezali kotósa yango. Mpo na nini? Bakómá naino na Kalvári te. Ya solo. Bamoni naino te.

¹⁷¹ Bakotiola bino pe bakobenga bino . . . bakobenga bino ata “Batúntuki”, “Ba-Jésus seul”, pe bankombo nyonso ya bilandá-landa oyo bakoki kobenga bino. Nkombo bakobenga bino ekosala nini? Nini bango . . . Ye amitungisaki mpo na nkombo oyo babengaki Ye? Abákámaki na ekulusu. Abikaki mpo na Nzambe, bobele mpo na Nzambe. Pe soki Molimo yango moko, oyo ezalaki

na kati na Ye, ezali kati na yo, ekosala ete ósala kaka makambo yango moko: kobengama na Nkombo na Ye. “Nyonso bokosala” (Biblia elobi) “na maloba to na misala, bósála yango na Nkombo na Yesu, na kopesa masanzoli na Nzambe.”

¹⁷² Malakisi wana ya bosato, ya bapagáno, bozuaka yango wapi? Na katekisimo, kasi na Biblia te. Liloba oyo “bosatu bosantu” ekomami ata na esika moko te na Makomi mobimba, kobanda na Genese kino na Emoniseli. Likambo yango ezalaka te. Nzambe misato pe azalaka te. Azali Nzambe, bobele Nzambe moko, Nzambe moko. Azalaka ntango nyonso Nzambe moko. Asalaki na misala misato: Asalaki mbala moko lokola Tata, na eleko ya Mose. Asalaki mbala moko na nzoto, lokola Mwana, Yesu. Azali kosala sikawa lokola Molimo Mosantu. Kasi ezali kaka Nzambe moko. Nzambe moko, kasi na bankombo misato te. Misala misato nde, bibiangelo misato na Nkombo moko: Yesu Klisto.

¹⁷³ Nyonso oyo ekesani na yango ezali bopagáno; pe nasengi ete moto moko álakisa yango, soki ezali bongo te. Ya solo. Nalobá yango bambúla na bambúla na bambúla, kasi ata moto moko atelemela yango naino te (bomoni?), mpo ekoki kozala te. Nazali na . . .ya liboso, Biblia yango oyo; histoire ya kala pe ezali, mpo na kotalisa polélé ete ezali mpenza bongo. Kasi mpo na nini zabolo azali . . .? Ngai . . .Ee, Biblia nde elobi ete bakozala ndenge wana: “Bakoyá ndenge nini, soki Nabendi bango te?” Yango nde nyonso oyo ngai nayebi mpo na yango. Yango nde oyo Yesu alobaki, bongo . . .

¹⁷⁴ Nazali koloba bongo te mpo na kozala . . .Soki nalobaki bongo, pe natei liteya ya boye, nakozala moto ya bilongi mibale ya nsoni koleka kati na bino. Ya solo. Nalobi bongo mpo Ezali Solo pe Ezali Bomo. Baoyo nyonso babátísámá kati na Klisto, balátá Klisto. Bazali na Bomo, na Nkombo na Ye.

¹⁷⁵ Tobondelaka na Nkombo na Ye, tolukaka na Nkombo na Ye, toteyaka na Nkombo na Ye, tobatisaka na Nkombo na Ye, tobikaka na Nkombo na Ye, tokufaka na Nkombo na Ye, tokendeke na Lola na Nkombo na Ye, tosekwaka na Nkombo na Ye. “Libota mobimba na Lola ebengami Yesu.” Biblia nde elobi bongo: “Libota mobimba na mokili ebengami Yesu.” Alobaki: “Nayaki na oyo ya Ngai . . .”

Okoloba: “Ee, ezali nde Nkombo ya Tata.”

Tata ezali nkombo te, ezali ebiangelo. Alobaki: “Nayaki na Nkombo ya Tata na Ngai, kasi boyambaki Ngai te.” Sikawa, Ayaki na Nkombo nini? Ah-ha. Ya solo mpenza, “. . .kasi boyambaki Ngai te.”

¹⁷⁶ Na bongo, yango mpenza; ezali bobele, iyo, ebombámá na miso ya bato na bwanya pe ya mayele. Ya solo, ezali mpenza bongo, ah-ha.

177 Pe kuna na Emoniseli, ndenge totayaki mokolo wana: ezali na lingomba mwasi ndumba ya kala, elingi koloba ebongiseli ya liboso; na sima, azalaki na bana basi ebele oyo ye abotaki. Bango pe basalaka ndenge moko, bazali na mimesano ya ndenge moko. Bango nyonso bakosuka na Babilone, ndenge moko, na . . . ná lingomba ya Roma pe lisanga ya mangomba ya—ya mabota; pe ye wana, bango nyonso bakómi na suka, bango nyonso kati na eloko yango moko, na masuwa yango moko.

178 Kasi Lingomba ya Nzambe (Aleluya!), ezali Lingomba oyo ebéngamá libanda, oyo etiámá pembeni. Lingomba yango etongámá ndenge nini? Okoyeba yango ndenge nini? Ndenge nini okoki koyeba ete oyo nde Solo? Soki Nzambe amonisi yo yango. Ndenge nini—ndenge nini Abele ayebaki ete ezalaki mpate na esika ya ba-póme? Emonisamelaki ye: “Na kondima Abele apesaki na Nzambe mbeka ya malamú koleka.”

179 Ntango Azalaki kokita na Ngomba ya Kobóngwana, Yesu alobaki: “Bato balobaka ete Ngai nazali nani?”

Bamosusu balobaki: “Eliya,” “Mose,” pe bongo na bongo.

Alobaki: “Kasi Nazali kotuna nde bino: ‘Bino bolobaka ete Ngai nazali nani?’”

Petelo alobaki: “Ozali Klisto, Mwana na Nzambe na bomoi.”

180 Alobaki: “Oyekoli yango te . . .” Na elobeli mosusu (nalobi boye te mpo na kozala monene, kasi mpo na kobeta sété na likambo yango malamú): “Oyekoli yango na líkindo moko boye te, moto moko atei yo yango te, kasi Tata na Ngai oyo azali na Likolo nde amonisi yo yango: ete NAZALI (Tata, Mwana pe Molimo Mosantu te, kasi, Nazali Yesu Klisto.) Pe likolo na libanga oyo (Libanga nini? Bobele oyo Abele alandaki; likolo na libanga yango moko.), likolo na libanga oyo, Solo ya Nzambe, ya molimo, oyo emonisami, Nakotonga Lingomba na Ngai, pe bikuke ya ewélo ekoki kolóngá yango ata moke te.” Ya solo. Bamekaka yango, kasi bakolóngá ata moke te. Bomoni?

181 Na bongo, kendé bobele na Kalvári, bákámá na ekulusu, zóngá, pe támbólá elongo na mwa batiolami ya Nkolo, kendé liboso.

182 Sikawa, Nkolo, topesi Yo biloko nyonso. Nayebi te, kati na etóngá oyo, oyo ezali awa. Nayebi ata moke te, Nkolo, lobá bobele soki Olingi komonisa yango. Pe sikawa, Tata Nzambe, nasengi Yo te ete ósala yango. Natii yango bobele na maboko ya bato. Bango wana. Tika ete oyo ézala Kalvári ya solosolo na ntongo ya lelo; tika ete ézala kobákama na ekulusu ya solosolo ya mokano ya moto ye moko, ya ba-mposa ya moto ye moko, pe ya biloko minene ya bomoi.

183 Tika ete mibali bákóma na komikitisa, pe na mposa ya kotámbola elongo na mwa batiolami ya Nkolo. Tika ete bátámbola na komikitisa. Tika ete bábótama kati na Bokonzi

oyo, Bokonzi monene oyo ya Nzambe, oyo ezali nzoto ya molimo, nzoto ya likolo ya Klisto na mokili: “Na Molimo moko, biso nyonso tobatisami kati na nzoto moko.”

¹⁸⁴ Sala yango, Nkolo. Bázala bato moíndo, mindele, jaune, chocolat, to lángi nini, mibali to basi, na boómbo to na bonsomi: biso nyonso tosálémá mpo tómela bobele na Molimo yango moko.

¹⁸⁵ Sala yango, Tata, pe tika ete ésalema na...kati na bato mingi, na ntongo oyo, ete básósola; tika ete Ófungola lisósoli na bango. Na bongo, ekozala lokola mokolo ya sika mpo na bango: moi ekongenga, pe póle ya mawa makasi, oyo ya mákindo ya bato, ekokufa moke-moke, pe Póle ya Nzambe ekongengela mwa nzela na bango, pe ekopasola ridó oyo ezali kozipa Póle kitoko oyo. Pe bakoki kotámbola na balabala monene ya bosantu, na ntango yango, kobika mpo na bamosusu, ndenge Klisto asalaki.

¹⁸⁶ Sikawa, wana tolingi kobanda molongo ya mabondeli, nabondeli ete Ópakola basali na Yo na ntongo oyo, biso nyonso, wana tozali kobondela, bamoko mpo na bamosusu. Pe sala, lelo, ete mobeli nyonso oyo akoleka na molongo ya mabondeli oyo ábikisama. Tika ete bázonga, lokola mwana mwasi wana ya miso etálá pembeni, pe mwana mobali wana, ná...pe mwasi mobange wana, pe—pe Ndeko Wright, pe bato mingi oyo baleká na yango, Nkolo, oyo bazalaki na bolózi, makono pe mpasi oyo minganga bakokaki kosalisa te; pe bango oyo lelo (eleki soko mposo moko), pe bango oyo, na nzoto kólóngónó, lelo.

¹⁸⁷ Nzambe, tika ete mibali pe basi báleka awa na kondima wana moko, na koyeba ete bazali kokende na Kalvári mpo na kobákama na ekulusu na makanisi na bango pe na ndenge na bango ya komona makambo, ete “basílá kobika”. Tika ete nguya oyo esekwisaki Yesu na nkunda épésa bango bomoi, bomoi monene ya kondima.

¹⁸⁸ Na sima, kaka sima na yango, tika ete bato mingi báyá na mai mpo na kobatisama. Tosengi, na Nkombo na Yesu. Amen.

¹⁸⁹ Sikawa, totikali bobele na miníti ntuku mibale mpo na kobondela mpo na babeli pe mosala ya libatisi. Sikawa tozali na bakálati ya mabondeli te. Tobandáká nde wana, pe tokomeka kosala yango na mayangani na ngai ya minene na ntango nyonso tokobanda yango. Nayebisaka bino makambo nyonso, totalisaka yango polélé, tozali na yango na bande, pe bisika nyonso nakokende, ba-bande wana ekotindama liboso.

¹⁹⁰ Elembo etalisaka bobele lipamboli. Likanisi ezalaki: “Soki okobondela mpo na babeli, sálá ete bato bándima yo.”

Nalobaki: “Bakondima ngai te.”

Alobaki: “Bilembo oyo ekopesamela yo, pe na nzela na yango, bakondima.” Bilembo yango esalemi mbala na mbala, na mibu zomi na mokili mobimba, ekwei ata mbala moko te.

Kokweya, ata moke te, kati na yango. Bato boni bayebi ete ezali ya solo?

¹⁹¹ Ee, soki bokoki kondima elembo, bóndima pe Nsango. Ya solo. Etalisaka nde yango. Pe Nzambe akoki kotia Nsango kati na ngai (Pe kotika yango ébonga be boye, kasi . . .) bongo náyébisa bino eloko oyo ekozala lokuta? Nzambe akotika ngai násála yango te. Te, te, Te, misie. Nazali koyebisa bino Solo.

¹⁹² Sikawa, bino nyonso oyo bolingi ete bábóndela mpo na bino, tóloba, oyo bozali na molongo oyo, bóleka na ngámbo oyo, soki bolingi, kuna, bósala molongo na ngámbo ya mobali. Na bongo ekosunga mpo bato báyá boye, wana tozali kobondela. Bongo tokosenga na ba—bandeko mibali, bawisié ná bamosusu bakosenzela; pe wana bazali koleka awa, na ntango wana na ngámbo oyo, tokolekisa bango boye mpo bázonga, pe tokolekisa bango na nzela yango. Tokobondela mpo na moto nyonso.

¹⁹³ [Moto moko asololi na Ndeko Branham—N.D.E.] Oh, te, te, ngai te. Ee, na ntango nyonso bolingi. Ekosala eloko te. Bokoki kobimisa mwasi yango, to bo . . . nakoki . . . bóbimisa ye kuna sikawa, to sima na mwa ntango, na ntango nyonso oyo ye alingi, ekosala eloko te.

¹⁹⁴ Sikawa, tófánda mpenza kimia, na mwa miníti oyo ezali kolanda. Nalingi ete bino nyonso bókanisa boye: Sikawa, Biblia elobi—elobi nini? “Libondeli ya kondima ekobikisa mobeli.” Bato boni bayebi ete ezali solo? Bato boni bayebi ete Biblia elobi: “Bilembo oyo ekolanda baoyo bakondima. Misala oyo Nazali kosala, bino pe bokosala yango”? Pe misala yango ezalaki nini? Alobaki: “Nakoki kosala yango soki bino bondimi ete Nazali na makoki ya kosala yango.” Ezali bongo?

Motuna na ngai ezalaki nini? “Bakondima ngai te.”

Alobaki: “Bilembo oyo ekosala ete bándima.”

¹⁹⁵ Sikawa, soki bondimi, bómilengela: Ngonga na bino ya kokangolama yango oyo. Kaka ndenge ekokaki kozala mpo na kokangolama na masumu, ezali kaka elaka moko ya Nzambe yango moko.

¹⁹⁶ Sikawa, tozali na mwasi moko awa, azali na bokono, azali na bokono ya estomach, auti na New Albany. Tokobondela liboso mpo na ye, mpo ákoka kozua—kozua esika ya kofanda. Sikawa, moto nyonso áfánda kimia, sikawa. Nalingi ete bandeko oyo bazali awa básunga ngai. Sikawa, tógúmba mitó mwa moke, mpo na kobondela.

¹⁹⁷ Sikawa, Tata na Likolo, oyo ezali Liloba na Yo. Nazali na mokumba ya makambo oyo ekosalema na ntina na yango te, kasi nazali na mokumba ya koteya yango. Pe koyeba likambo oyo (pe koyeba ete mibu na ngai esili kopusana, pe mokolo moko nasengeli kokutana na Yo): Natei Solo uta na motema na ngai.

Oyebi yango. Ezali mpo na komilakisa te, soki ezalaki bongo, Nkolo, nasengeli kobóngola motema.

¹⁹⁸ Pe Tata, nabondeli ete Ósunga, sikawa, wana tobandi kobondela mpo na babeli, tika ete mabondeli na ngai ézua biyano, bobele mabondeli na ngai te, Nkolo, kasi libondeli ya losambo oyo, wana bandeko oyo. . . Bongo soki mwasi oyo atele mi awa azalaki mwasi na ngai? Bongo soki mwasi oyo afandi na kiti ya bibósono ezalaki nde ye? To ndeko na ngai ya mwasi? Mama na ngai? Oh, Nzambe, bikísá bato oyo. Okolinga kosala yango, Nkolo?

¹⁹⁹ Tala bato oyo batelemi na molongo ya mabondeli: bazali na maládi ya motema, cancer, tumeur, makono pe malózi ya ndenge na ndenge. Mingi kati na bango bazali koya (bato nkama na nkama bazali kokangolama, kobanda mpenza awa, Nkolo), pe bazali komona yango, pe bazali kondima yango, pe bazali koya na molongo ya mabondeli mpo na koyamba oyo ya bango. Bazali koya epai na Libanga na bomoi sikawa, epai na mosali na Yo te, kasi epai na Mwana na Yo, Yesu, Oyo azali Mokambi ya Lingomba, Moto ya molimo, oyo amonanaka te, oyo azali elongo na biso. Pe wana tobandi, kopesa mbeka ya Nkombo na Ye (Olobaki: “Na Nkombo na Ngai, bakobengana milimo mabe.”), nabondeli ete Ópesa biyano na mabondeli na biso, na Nkombo na Yesu. Amen.

²⁰⁰ Sikawa, moto nyonso ázala kati na mabondeli. Sikawa, oyo ezali pe eteni ya mosala na bino. Oyo ezali libondeli na bino.

Sikawa mwasi oyo asengeli kokufa, soki Eloko moko esungi ye te.

²⁰¹ Bato boni bayebi Ndeko Stadskev? Ndeko mobali pe Ndeko mwasi Stadskev? Na butu mosusu wana, babengaki ngai mbala misato na Alemagne; bebé na bango akufaki. Batunaki ngai: “Ndeko Branham, tomonaki yo kosekwisa bakufi, na nzela na Molimo ya Nzambe,” (Bazalaki wana pe bamonaki yango. Bomoni?) “pe toyebi ete ozali mosakoli ya Nkolo. Lobá bobele Liloba.”

Nalobaki: “Nakoki koloba yango te, soki etiami na monoko na ngai te.”

“Yaka na Alemagne.” Natelemaki noki-noki. Pe babengaki: “Tozali na mpépo ya mbangu makasi oyo ekoki komema yo na Alemagne na ngonga motoba.” Mpépo ya basodá, oyo ya mbangu makasi nde elingaki komema ngai na Alemagne mpo na kosekwisa bebé oyo akufaki. Mpépo ya basodá, oyo ya mbangu makasi elingaki kokómisa ngai kuna na ngonga motoba, longwa na Louisville kino na Munich, na Alemagne.

²⁰² Nakotaki kuna, nafukamaki, pe nalobaki: “Tata, nasengeli koloba nini? Lobá na monoko na ngai.” Apesaki ngai eyano te. Nakendeki na zamba, nalobaki: “Tata, nasengeli koloba nini? Tia

maloba na monoko na ngai. Soki te, nakokende bobele mpamba.” Nazongaki, Apesaki ngai eyano te. Nakotaki. Butu mobimba nazalaki kobondela: “Nkolo, tia maloba na monoko na ngai.” Eyano moko te.

²⁰³ Na ntongo oyo elandaki, mwasi na ngai alamukaki. Bobele ntango abimaki, Liloba (natelemaki), Alobaki: “Kopámela yango te. Ezali loboko ya Nkolo.” Ah-ha.

Bongo noki-noki na telefóne: “Nakoki koya te. Te, ezali loboko ya Nkolo. Epekisameli ngai.” Bomoni nguya oyo ezali kati na mpámélá yango? Soki Nzambe alobi: “Komeka kosala yango te, mpo ezali loboko ya Nkolo.”

²⁰⁴ Sikawa, Mose, mokolo moko, bapekisaki ye kosala likambo moko, ata bongo akendeki kosala yango. Bozali komikanisela? Na bongo ngai—ngai nakendeki te.

²⁰⁵ Pe nakoki komemela bino mikanda ya bato minei bakeseni, mpo na kotalisa, oyo, minganga balobaki ete bakufi, sima na kobondela pe kopámela kufa. Bomoni? Tozali wana mpo na kopámela eloko yango. Pe soki Nzambe apésá yo nguya ya kosala likambo moko, ekozala malamú ete ókéba na oyo ozali kosala. Bomoni? Ekozala malamú ete óké- . . . Alobaki: “Bó . . .”

²⁰⁶ Sikawa, bómikanisela, mbala mosusu bino bososoli yango mpenza te, kasi mpo na ngai, ezalaki na ntina monene. Bomoni?

“Kopámela yango te.” Mongongo ya bopolo pe ya boboto mingi (pene na ngonga ya motoba na ndambo, nabanzi ezalaki na ngonga wana, ngonga ya motoba na ndambo na ntongo wana) elobaki: “Kopámela yango te. Ezali loboko ya Nkolo.”

Nalobaki: “Natondi Yo, Tata. Natondi Yo, Nkolo. Nakosala yango te.”

²⁰⁷ Soki Alobaki: “Pámélá yango. Oyo ezali moyini nde amikótisi.”

Nalingaki koloba: “Tókende.” Pe elingaki kokokisama.

²⁰⁸ Ntango mwana mobali wana na Finlande alalaki kuna, ebembe, baniataki ye, ata mokuwa moko ya malamú na nzoto na ye etikalaki te, Nkolo alobaki ete ezalaki loboko ya Satana, Alobaki: “Pámélá yango.”

²⁰⁹ Pe nalobaki: “Kufa, okoki kokanga ye te. Zongisa ye, tika ye.” Kuna, atelemaki na mbala moko, nzoto malamú, ata mokuwa moko ya kobukana na nzoto na ye te. Yango nde Liloba ya Nkolo. Nakoki kosalela Liloba ya Nkolo te, soki Liloba ya Nkolo eyeli ngai te.

²¹⁰ Kasi kati na Makomi, Liloba ya Nkolo epesi ngai etínda ya kobondela mpo na babeli oyo; epesi bino etínda ya kobondela mpo na bango. Sikawa, “libondeli ya kondima ekobikisa mobeli;” tóbondela, bógúmba mitó; tokotala soki Akoloba nini, wana bozali koleka.

211 Ozali Moklisto, boye te? Ondimi na motema mobimba ete Yesu akobikisa yo? Ozali na mwa bokono ya estomach; obeli yango mibu ebele, ndeko mwasi. Sikawa, okobika, soki okondima.

212 Sikawa, Nkolo Nzambe, mwasi oyo asengeli kokufa, soki Osungi ye te. Sikawa nabondeli, wana nazali kotala ye, namoni ata ntina moko te oyo ekosala ete ákufa.

Nazali koyoka na molimo na ngai, Nkolo, ete ezali mokano na Yo ya ndingisa, sikawa, napámeli yango: Satana, tika ye!

Na Nkombo na Yesu Klisto, tika ete ábika, áyá na losambo oyo, kotatola mpo na nkembo na Nzambe. Amen.

213 Sikawa, kaka ndenge ezali pete boye, madáme, okobika. Ondimi yango, ndeko mobali?

[Ndeko Branham akei mosika na mikró—N.D.E.] Ondimi, yo awa, ete okobika?

Kende sikawa, bandá kolia biloko nyonso oyo o . . . na sima, okobika.

Sikawa, okanisi ete okobeta mokili ebotú, pe okobuka yango; yango nde ebeti yo ebotú, pe ebuki yo. Sikawa, Nzambe ya Likolo, oyo alongoli etúmbu na Ye na mokili mpo na kopesa bolimbisi na masumu, kaka na Nkombo yango, Akoki kopesa yo bolimbisi ya masumu, kolongola yo etúmbu, pe kobikisa yo.

Ondimi ete Akoki kosala ete motema yango ébeta malamú? Soki ezali bongo, okobika . . . ? . . .

214 Nkolo Yesu, mwasi oyo asengeli kofanda na kiti oyo bomoi na ye mobimba, na sima, akolongolama. Kasi tozali kosenga ete nguya oyo, ya Satana, étika ye. Tika ete ázala na bomoi, átámbola pe ázala malamú ndenge azalaka. Tosengi yango na Nkombo na Yesu. Amen.

215 Ondimi? Ezali mosala oyo esílá kosalema, esálémá. Likambo nini? Na nsómo te, na . . . Ezalaki te . . . ? Osílá kobikisama na cancer mbala moko . . . ? . . . Kangólámá, pésá nyonso na Yesu.

216 Nkolo Yesu, natieli mwasi oyo loboko pe napámélí bokono na ye. Nayebi ete azali Moklisto, abótámá na Molimo. Nalongoli yango kati na ye, na Nkombo kitoko, Nkombo na Yesu Klisto. Amen.

217 Nkolo Nzambe, mpo na ndeko na ye ya mobali, ya motuya, nasengi lobiko na ye ya molimo na Nkombo na Yesu. Kangámá na yango. Amen. Ekosalema.

218 Obelemi koyamba lobiko ya nzoto na yo, mwana? Malamú, ekei kino na loboko na Ye.

219 Nkolo Yesu, likolo na elenge mobali oyo, oyo alobaki, uta na Yo, azali kobondela mpo na kozua lobiko ya nzoto na ye. Lokola mosali na Yo, natieli ye maboko na Nkombo na Yesu Klisto . . . ? . . . Amen.

Sikawa, ata...?....sikawa, bélélá bobele Nkombo na Ye. Sikawa, epai—epai na ngai te...?....

²²⁰ Tata Nzambe, bobele lokola mwana mobali oyo azalaki koyekeme na tólo ya mama na ye, mama azalaki kobondela ye pe—pe kobondela elongo na ye pe azalaki kosimba mwa loboko na ye ntango azalaki naino bebé mpenza. Sikawa, Satana atii mama na ye na lopitalo ya bato na libómá. Nzambe, ye ayei na Lingomba mosantu ya Nzambe na bomoi, Lingomba oyo ebotámá na Molimo ya Nzambe, Lingomba oyo Molimo ya Nzambe ezali kobika kati na yango, pe komitalisa Ye moko. Pe lelo, na nzela na libondeli, tokangoli mwasi yango na lopitalo yango. Tobondeli na Nkombo na Yesu Klisto. Amen.

Zóngá na ndako, okómi malamú.


Natondi yo ndenge oyei kosenga mpo na mama na yo; oyo wana nde mwana ya solosolo.

²²¹ Lelo nde mokolo na yo ya kokangolama. Nkolo Yesu, mpo na elenge mwasi oyo, mpo na lobiko ya molimo ya mobali na ye pe mpo na kokangolama ya mongóngó na ye, tika ete áyamba yango na Nkombo na Yesu Klisto, Oyo alobi ete “yaka kondima yango,” pe ete ezali eloko oyo esílí kosalema.

²²² Nkolo, minganga basílí koloba, Nkolo, ezali kati na nzoto na ye, ezali kokota na liso ya mwasi oyo. Ayei mpo na kokangolama, likolo na etumbelo oyo, wana Lingomba mosantu oyo bazali kobondela, nasengi kokangolama na ye na Nkombo na Yesu Klisto, mpasi oyo ekotika nzoto na ye. Ezali mosala oyo esílá kosalema.

Mpo na mwana na ye ya mobali, napámboli muswále oyo. Tika ete koyoka pe lolenge malamú ézonga na litoi na ye...?....

²²³ Sikawa, Lingomba ezali koloba; sikawa, Lingomba ezali Nzoto ya Klisto oyo emonanaka te. Bisó nyonso tozali kobondela mpo na yo. Omoni? Tolobi te—tolobi te ete tozali lisusu na mokili te. Tolobi te ete tozali komituna epai nini tozali kokende. Tosílá komona Nzela. Tobótámá kati na Nzela yango. Tozali Lingomba ya Nzambe na Bomoi (eteni na yango); na ntembe te, ezuami na mokili mobimba. Kasi oyo ezali etóngá na yango. Lelo, toyei elongo na Nkombo na Ye. Toyei kosala eloko Alobaki ete tósala. Oyo Akoki komonisa te ntango tosonianaka. Kobondela mpo na babeli, kotiela bango maboko, “libondeli ya kondima ekobikisa mobeli.”

²²⁴ Bokono na yo ya motema étika yo. Na Nkombo na Yesu Klisto, natósi etinda oyo Nzambe apésá ngai...?.... 

MOKOLO WANA NA KALVÁRI LIN60-0925
(That Day On Calvary)

Liteya oyo ya Ndeko William Marrion Branham, eteyamaki liboso na monoko ya Ngelesa na mokolo mwa lomingo na ntongo, mokolo mwa 25, sanza ya libwa, na mobu 1960, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org